

DISOLO YA LUZINGU YA MUNU



Beto kulumusa bayintu ya beto na mwa ntangu fioti samu na kusambila.

Tata ya beto ya Mazulu ya kufuluka na lemvo, ya kieleka beto me kuzwa ntangu ya mbote na kukwisa pene-pene ya Nge, Nzambi ya beto mpe Mvulusi. Na kuwa mukunga yayi ya kitoko, *Mutindu Nge Kele Nene*, yawu ke ningisa beto samu beto zaba ti Nge kele nene. Mpe beto ke sambila ti bunene ya Nge ke monisama diaka na beto, na manima ya midi yayi, na ntangu beto ke tuba. Ntangu ya mbote me pesama na munu, samu na mbala ya munu ya ntete kati ya bamvula mingi, na kumeka kuvutukila disolo ya luzingu yina me luta, mpe mu ke sambila ti Nge ke pesa munu ngolo mpe—mpe yina mu ke na yawu nsatu, Mfumu, kuvwanda na ngunga yayi. Mpe bika ti bifu nionso na luzingu ya munu kuvwanda kimatinu samu na kunata bantu yankaka, pene-pene ya Nge. Pesa yawu, Mfumu. Bika ti bansumuki kumona bitambi na zulu ya zelo ya ntangu, mpe bika ti bawu twadisama na Nge. Beto ke lomba bima yayi na Nkumbu ya Mfumu Yesu. Amen.

Beno lenda vwanda.

² [Mpangi Glover me tuba, “Nge lenda sambila samu na bamuswale yayi na ntwala nge banda?”—Mu.] Mu ke vwanda na kiese. [“Yankaka yawu *yina* mpe yawu *yayi* samu na kusambidila yawu.”] Mbote mingi, tata, matondo na nge. Mutindu mosi santu yayi, Mpangi Glover, yina mu me zaba ntangu yayi mwa bamvula fioti me luta, mu zwaka ntangu ya mbote ya kuvwanda na yandi fioti mazono na nkokila. Mpe yandi me tuba na munu ti . . . yandi lalaka mwa ntangu fioti, samu na kupema. Mpe ntangu yayi, na bamvula makumi sambwadi na tanu, yandi ke na kuvutukila kisalua ya Mfumu. Kulemba yina mu vwandaka na yawu ntete na ntwala ya kuwa yandi me kuma ata kati-kati ve. Mu banzaka ti mu lembaka, kasi mu—mu ke kwikila ti mu ke ya kulemba ve. Yandi me tudila munu bamuswale awa, na mutindu ya ba envelope, mpe nionso yina, sika wapi yawu vwandaka mpe ba me vutula yawu na kati.

³ Ntangu, muntu nionso kati ya beno yina ke landa na radio, to awa, yina ke na nsatu ya mosi ya bamuswale yayi, mpe beno lenda . . . Tempelo Angelus ke tindaka yawu mbala na mbala, konso ntangu. Beno lenda sonika awa kaka na Tempelo Angelus mpe ba ke sambila samu na yawu, mpe mu ke tuba na beno ya kieleka ti yawu kele Masonuku. Ya ke nsilulu ya Nzambi.

⁴ Mpe kana nge zola ti mu sambidila muswale mosi samu na nge, mpamba ve, mu ke vwanda na kiese na kusala yawu. Beno lenda sonikila munu na boite postale 3-2-5, 325, Jeffersonville,

yawu ke sonamaka mutindu yayi J-e-f-f-e-r-s-o-n-v-i, ba-l zole, e. Jeffersonville, Indiana. To kana beno me zimbana boite postale, beno sonika kaka “Jeffersonville.” Ya ke mbanza mosi ya fioti, ya bantu pene-pene ya mafunda makumi tatu na tanu. Muntu nionso kuzaba munu kuna. Mpe na yawu beto ke vwanda na kiese na kusambila samu na muswale mosi mpe kutinda yawu na beno.

⁵ Mpe, ntangu yayi, beto me kuzwa lunungu ya nene na kusala mutindu yayi, samu. . . Beno ke kuzwa mukanda mosi na yawu, yina me tuba ti bantu nionso ke sambila konso suka na ngunga yivwa na yinza ya muvimba, mpe na ngunga kumi na zole mpe na ngunga tatu. Mpe beno lenda banza, kuna na ndambu yankaka ya yinza, yinki ntangu ya mpimpa bawu fwana telama samu na kusala kisambu yayi. Na yawu kana makumi ya mafunda, mpe bambala mafunda, ke tinda bisambu na Nzambi na ntangu yina mosi samu na ministere yayi, samu na kimbevo ya beno, Nzambi lenda manga yawu ve. Mpe mpamba ve na ntangu yayi beto, mutindu mu me tuba, beto ke na manaka mosi ve, beto ke na nsatu ya mpata mosi ve ya mbongo. Beto ke kaka. . . Kana beto lenda sadisa beno, samu na yina beto kele awa. Mpe bika beto. . .

Muntu yankaka ke na kukwisa na nkuti yankaka ya bamuswale.

⁶ Ntangu yayi, kana nge ke na muswale ve yina nge lendaka tinda, mbote, na yawu nge sonika kaka, na mutindu nionso. Kana beno ke na nsatu ya yawu ve na ntangu yayi, bumba yawu na kati ya Buku ya Bisalu, na kati ya Biblia, na kapu 19. Mpe ke vwanda na mutindu ya kitini ya lele yina ba ke tinda beno, mpe bandongisila yina ke talisa yinki mutindu beno fwana ntete kundima masumu ya beno. Mpe (matondo na nge) yinki mutindu kundima masumu ya beno. Beno fwana ata fioti ve kumeka kuzwa konso kima yina na Nzambi kukondwa ntete kuvwanda ya kusungama na Nzambi. Beno me mona? Mpe na manima ba me longisa beno kati na yayi na kubokila bankalani ya beno, mpe pasteur ya beno. Kana beno ke na konso kima yina na kati ya ntima ya beno yina me telemina muntu mosi, beno kwenda sungika yawu ntete, mpe beno kwisa vutuka. Mpe na manima beno sambila, beno sala lukutakanu ya bisambu na yinzo ya beno, mpe beno kanga muswale yayi na epengele na lele ya beno ya kati, na manima beno kwikila Nzambi. Mpe na bangunga tatu yina, konso kilumbu, ke vwanda na bantu ke sambila na yinza ya muvimba, ya kulandana na yinza ya muvimba.

⁷ Mpe ntangu yayi yawu ke ya beno, ya ofele kaka, beno tinda yawu kaka. Mpe—mpe, ntangu yayi, beto ke sonika na beno ve samu na kuyangisa beno to kutuba na beno samu na mwa manaka mosi beto ke na yawu. Beto zola ti beno simbisa manaka, kasi beto ke na yawu ve—yawu ve yina beno lenda simbisa. Beno me mona? Na yawu. . . Ya ke samu na kuzaka ve kisika

beno ke vwandaka, yawu kele kaka samu na kusadisa beno mpe ministere ya Mfumu, yina beto ke meka na kulanda.

⁸ Ntangu yayi beto kulumusa bayintu ya beto. Mpe kana beno ke landa na radio, mpe beno ke na muswale ya beno kuna, beno tula diboko ya beno na zulu ya yawu na ntangu beto ke sambila.

⁹ Mfumu yina me fuluka na lemvo, beto ke nata na Nge mwa mabuki yayi, mbala yankaka kati ya yawu ke monana mutindu mwa bilele ya ba bébé, to—to mwa bilele ya kati, to mbala yankaka mwa basapatu, to—to kima mosi, muswale mosi, yina ke kwenda na bambevo mpe bantu ya mpasi. Mfumu, beto ke sala yayi na kulandaka Ndinga ya Nge. Samu beto me tanga, na kati ya Buku ya Bisalu, ti bawu vwanda baka na nzutu ya kisadi ya Nge, Paul, bamuswale mpe bitenda ya bilele, samu bawu kwikilaka ti Mpeve ya Nge vwandaka na zulu ya muntu yayi. Mpe bampeve ya yimbi basikaka na bantu, mpe bampasi mpe bimbevo bikaka bawu, samu bawu kwikilaka. Mpe ntangu yayi beto me bakula, Mfumu, ti beto kele ve Santu Paul ve, kasi beto zaba ti Nge ke kaka Yesu. Mpe beto ke sambila ti Nge zitisa lukwikilu ya bantu yayi.

¹⁰ Mpe yawu tubamaka mbala mosi ti na ntangu Israel, yina mekaka na kutumama na Nzambi, na ntangu bawu kangamaka na mutambu, nzadi na ntuala ya bawu, miongo ndambu na ndambu, mpe makesa ya Pharaon ke pusana. Mpe muntu mosi tubaka, ti “Nzambi kulumusaka meso na nzila ya Dikunzi ya Tiya yina, na meso ya kifuluka na makasi, mpe nzadi bangaka mpe yawu vutukisaka na manima, mpe salaka nzila mosi samu na Israel na kukwenda na ntoto ya nsilulu.”

¹¹ O Mfumu, kulumusa diaka meso, na ntangu ba ke tula mabuki yayi na zulu ya banzutu ya bambevo samu na kubambuka Ndinga ya Nge ya moyo. Mpe bika ti bimbevo kubanga, tala na nzila ya Menga ya Mwana ya Nge, Yesu, Yina fwaka samu na kukatula masumu. Mpe bika ti mbeni kubanga mpe ya kwenda ntama, na mutindu ti bantu yayi kukota na nsilulu yina me tuba, ti “Na zulu ya bima nionso,” yina ke nsatu ya Nge “ti beto sakumuka na mavimpi.” Pesa yawu, Tata, samu beto ke tinda yawu na—na dibanza yina na kati ya bantima ya beto. Mpe yina ke kikuma beto ke na kulanda. Beto ke tinda yawu na Nkumbu ya Yesu Klisto. Amen.

Matondo na nge, Mpangi Glover. Matondo na nge, tata.

¹² Ntangu yayi, mutindu nkokila yayi kele ya nsuka samu na kitini yayi ya reveil, mu zaba ve kana ba ke lutisa yawu na radio to ve, kasi mu zola tuba (kana ve) na bayina ke landa na radio, ti yayi me vwanda mosi ya balukutakanu ya kulutila kitoko na yina me vwandaka na yawu na kati ya bamvula mingi, mingi. Yawu vwandaka lukutakanu mosi ya kulunga, ya mbote, ya zola, ya ngwisani yina me vwandaka na kati ya yawu ntangu ya yinda.

¹³ [Mpangi-bakala mosi me tuba, “Beto ke na kulanda radio tii na ngunga yiya na bamuniti kumi na tanu, mpangi-bakala. Mpe bawu ke na kulanda nge, bisika nionso ya Californie ya sud, kuna na bisanga, mpe na bamasuwa. Beto me yamba bansangu yina me katuka na bawu. Mpe na yawu beno ke na bantu mingi, ba mafunda mpe makumi ya mafunda.”—Mu.] Matondo na nge, tata. Yina ke mbote mingi. Kiese mingi na kuwa yawu. Nzambi sakumuna beno nionso.

¹⁴ Mpe ya kieleka mu ke vwanda ntangu nionso na kisika mosi ya luswaswanu na kati ya ntima ya munu samu na Tempelo Angelus, na mutindu yawu me telama ngwi samu na Nsangu ya mbote ya Yesu Klisto na muvimba na yawu. Mpe, ntangu yayi, ya—ya ke monana mutindu diambu ya munu mosi na ntangu yayi. Ya ke monana ti, na manima ya munu kukutana na bantu nionso mpe na kumonaka ti bawu kele na mpeve ya mbote, mu ke mona ti me kuma mosi ya beno kulutila mutindu mu vwandaka ntete. Nzambi kusakumuna beno, yawu ke kisambu ya munu. Mpe. . . [Bantu me bula maboko—Mu.] Matondo mingi, na beno.

¹⁵ Ntangu yayi, yawu tubamaka ti bubu yayi mu lendaka tuba na beno na mwa ntangu fioti na yina me tadila: *Disolo Ya Luzingu Ya Munu*. Yina ke kima mosi ya mpasi samu na munu. Yayi ke ntangu ya ntete mu me meka na kutubila yawu kubanda bamvula mingi. Mpe mu ke vwanda na ntangu ve ya kutubila yawu na mudindu, kasi kaka kitini ya yawu. Mpe, kuna, mu salaka bifu mingi, mu salaka bima yina vwandaka yimbi. Mpe mu ke zola, ti beno yina ke landa na radio mpe beno yina kele awa, ti beno baka ve bifu ya munu mutindu masakuba, kasi matadi ya kumatina yina ke nata beno pene-pene ya Mfumu Yesu.

¹⁶ Na yawu, na nkokila yayi, ba ke kabula bakalati samu na *kisalu ya kusambila samu na bambevo* na nkokila yayi. Ntangu yayi, na ntangu beto ke tubila kisalu ya kusambila samu na bambevo, ya zola tuba ve ti beto ke belusa muntu mosi, beto ke “sambila samu na muntu mosi.” Nzambi kele yina ke belusaka. Yandi vwandaka kaka ya kufuluka na lemvo samu na munu, na mutindu ya kupesa mvutu na bisambu ya munu.

¹⁷ Mpe ntama mingi ve, mu vwanda tuba na ntwadisi mosi ya balukutakanu ya evangeliste yina me zabana mingi, mpe—mpe bawu yufulaka yandi samu na yinki evangeliste yayi vwanda sambila ve samu na bambevo. Mpe evangeliste pesaka mvutu na ntwadisi ya balukutakanu ya munu, yandi tubaka, “Kana. . .” Evangeliste yayi ke kwikilaka na kubeluka ya nzutu yina me katuka na Nzambi. Kasi kana yandi banda kusambila samu na bambevo, yawu ke bebisa lukutakanu ya yandi samu mabuundu ke simbisaka yawu. Mabuundu mingi, mpe mingi kati ya bawu, ke kwikilaka ve na kubeluka ya nzutu yina me katuka na Nzambi.

¹⁸ Na yawu mu ke pesa lukumu mpe luzitu na evangeliste yango samu yandi me bikala na kisika ya yandi, kisika ya yandi ya kisalu. Yandi lendaka mbala yankaka. . . Ya lenda ata fioti ve kubaka kisika ya yandi, mpe mu me ndima ve ti yandi lenda baka kisika ya munu. Beto nionso ke na kisika na Kimfumu ya Nzambi. Beto nionso me vukana kintwadi. Makabu ya luswaswanu, kasi Mpeve mosi kaka. Mu zola tuba ti, kumonisama ya luswaswanu, kasi Mpeve mosi kaka.

¹⁹ Mpe, ntangu yayi, na nkokila yayi lukutakanu ke banda. . . Mu banza bawu tubaka ti kubula musiki ke banda na ngunga sambanu na ndambu. Mpe, ntangu yayi, kana beno ke landa kuna na radio, beno kwisa kuwa yayi. Ya ke. . . Ya ke vwanda kitoko, ya ke vwandaka ntangu nionso mutindu yina.

²⁰ Mpe na manima mu zola tuba ti ba ke kabula bakalati ya bisambu mbala mosi na manima ya lukutakanu yayi, kaka na ntangu lukutakanu yayi ke mana, kana beno kele awa mpe zola baka kalati ya bisambu. Bawu me tuba na munu ntama mingi ve kuna na kati, mwana ya munu ya bakala to Tata Mercier to Tata Goad, ti bawu ke kabula bakalati ya bisambu. Beno bikala kaka na bisika ya beno. Kaka na ntangu lukutakanu ke mana, beno bikala kaka na bisika ya beno na mutindu ti bampangi kuluta na banzila mpe bawu kabula bakalati ya bisambu na nswalu nionso. Ata ti beno ke na balcon to na étage, bisika nionso, na nsi to bisika nionso beno kele, beno bikala kaka na bisika ya beno mpe bampangi ke zaba ti beno kele awa samu na kalati ya bisambu. Mpe na yawu na nkokila yayi beto ke sambila samu na bambevo. Mpe na nkokila yayi kana Nzambi kusoba ve mabanza ya munu, mu zola longa dilongi yayi, *Kana Nge Talisa Na Beto Tata, Yina Me Lunga Samu Na Beto*.

²¹ Ntangu yayi mu zola tanga masonuku na manima ya midi yayi, kaka samu na kubanda *Disolo Ya Luzingu Ya Munu*, yawu kele kuna na Buku ya ba Hebreux, kapu 13, mpe beto banda awa pene ya. . . Mu lunga tuba pene ya nzila ya 12.

Yawu yina, Yesu mpe kufwaka na nganda ya mbanza, samu na kusantisa bantu nionso na menga ya yandi mosi.

Beto kwenda. . . na yina beto basika na mbanza mpe beto kwenda kutana na yandi, samu ti ba vweza beto mutindu ba vvezaka yandi.

Samu awa na ntoto beto kele ve na mbanza yina kele ya seko, kasi beto ke na kusosa mbanza yina ke kwisa na mantwala.

²² Ntangu yayi yawu yina masonuku ya beto. Mpamba ve, beno me mona, kana yawu ke disolo mosi ya luzingu, to konso kima yina me fwanana na muntu, beto ke kembila yawu ve, mpe mingi-mingi mambu yina me lutaka ya muntu mosi, kana yawu vwandaka ya yimbi mingi mutindu mosi na ya munu. Kasi

mu banzaka, kana beto tanga Masonuku, Nzambi ke sakumuna Masonuku. Mpe dibanza ya munu kele:

Ti awa na ntoto beto kele ve na mbanza yina kele ya seko, kasi beto ke na kusosa mbanza yina ke kwisa na mantwala.

²³ Ntangu yayi, mu zaba ti beno zola Los Angeles mingi. Beno ke na kikuma ya kuzola yawu. Yawu ke mbanza mosi ya nene, ya kitoko. Na lubungi ya midinga ya yawu mpe nionso yina, kasi yawu ke mbanza mosi ya kitoko, na ntangu ya mbote. Kasi mbanza yayi lunga vwanda seko ve, yawu ke vwanda na nsuka.

²⁴ Mu kumaka na Rome (sika wapi bamfumu ya nene ke vwandaka) mpe bambanza yina bawu tungaka mpe banzaka ti yawu ke fwa ve, mpe beno lenda timuna na mudindu ya ba-mètre sambanu samu na kumona bitini ya yawu.

²⁵ Mu kumaka sika wapi Pharaon vwandaka na bimfumu ya bawu ya nene, mpe beno ke timuna na ntoto samu na kumona sika wapi ba Pharaon ya nene yalaka.

²⁶ Beto nionso ke zolaka kubanza samu na yina me tadila bambanza ya beto mpe bisika ya beto. Kasi, beno bambuka moyo, yawu lenda vwanda ya seko ve.

²⁷ Na ntangu mu vwanda mwana ya fioti mu vwanda kwenda na yinti mosi ya nene ya erable. Beto ke na mabaya mingi ya ngolo na yinsi ya beto. Mpe na yawu beto ke na bayinti yayi ya erable, erable ya sukadi, mpe yina beto ke bokilaka “erable ya ngolo” mpe “erable ya pete-pete.” Yinti yayi ya nene, yawu vwandaka yinti mosi ya kitoko mingi. Mpe na ntangu mu vwanda katuka na bilanga, na kisalulu ya matiti ya bitwisi mpe—mpe na kisalulu ya kubuka mbuma, mu vwanda sepela na kukwenda na yinti yayi ya nene mpe—mpe kuvwanda na nsi na yawu mpe—mpe kutala na zulu. Mpe mu lendaka mona mavala ya yawu ya nene, mpe ya ngolo ke ningana na mupepe, na nzutu ya yawu ya nene. Mpe mu tubaka, “Beno zaba, mu ke kwikila ti yinti yayi ke vwanda awa bankama na bankama ya bamvula.” Ntama mingi ve mu losaka meso na yinti yango ya ntama, yawu me bikala kaka kitini ya yinti.

²⁸ “Samu awa beto kele ve na mbanza yina kele ya seko.” Ve, kima mosi ve awa na zulu ya ntoto yina beno ke mona ke vwanda ya seko. Ya ke vwanda na nsuka. Konso kima yina ke fwaka fwana bika kisika na yina ke fwaka ve. Ata yinki mutindu beto me tunga mbote banzila ya beto, ata beto me tunga yawu mbote yinki mutindu, nionso ke luta, samu awa kele na kima mosi ve ke vwanda ya seko. Kaka Yina ke monanaka ve ke vwanda ya seko.

²⁹ Mu ke bambuka yinzo yina beto vwanda zinga, yawu vwandaka yinzo mosi ya ntama ya bayinti yina madusu ya yawu fikamaka na poto-poto. Munu . . . Mbala yankaka bantu mingi me monaka ata fioti ve yinzo yina madusu ya yawu me fikama na poto-poto. Kasi madusu ya yawu nionso vwandaka ya kufika

na poto-poto, mpe yinzo yango ya ntama tungamaka na bayinti ya nene-nene, mu banzaka ti yinzo yango lendaka zinga bamvula nkama. Kasi, beno zaba, bubu yayi ba me tungaka bayinzo mingi kisika yinzo yango vwandaka. Ya me sobaka mingi. Bima nionso me sobaka. Kasi. . .

³⁰ Mpe mu vwanda mona tata ya munu, yandi vwanda kaka muntu ya nkufi, muntu ya nene, ya ngolo mingi, mpe yandi vwanda mosi ya mwa bantu ya ngolo mingi yina mu zabaka. Mu kutanaka na Tata Coots, muntu yina yandi vwanda sala na yandi kisalu ya kuzenga bayinti, yandi vwanda muzengi-bayinti, mpe pene-pene ya mvula mosi me luta, mpe Tata Coots kele mpangi ya munu ya mbote mingi, mpe diacre na dibuundu ya Ntete ya ba Baptiste, mpe yandi tubaka, “Billy, mu banza nge ke muntu ya ngolo mingi.”

Mpe mu tubaka, “Ve, mu ke muntu ya ngolo ve, Tata Coots.”

³¹ Yandi tubaka, “Kana nge landaka tata ya nge, nge lendaka vwanda mutindu yina.” Yandi tubaka, “Mu monaka bakala yina, yandi vwandaka na kilo nkama mosi na makumi yiya ya bakilo makumi sambanu na tatu, yandi mosi vwanda kotisa kitini ya yinti na wagon, yina vwandaka na kilo nkama yivwa ya bakilo nkama yiya na nana.” Yandi zaba mbote-mbote mutindu ya kusala yawu. Yandi vwanda ngolo. Mu vwanda mona yandi kukuma samu na kusukula masa mpe kukubama samu na madia ya midi, na ntangu Mama vwanda bokila yandi.

³² Mpe beto vwanda na yinti ya pome ya ntama na ntwala ya yinzo, mpe na yawu ya vwanda na tatu yankaka to yiya ya fioti kuna na manima. Mpe na yinti yayi ya kati-kati vwandaka na tala-tala mosi ya ntama, ya vwanda ya kubukana, tala-tala mosi, ya nene. Mpe bawu komaka yawu na lweka ya yinti na bansonso ya kutekama. Ya kufwanana na yina beno bamenizie yina ke wa munu lendaka bokila “bansonso ya bilele.” Yawu vwanda ya kutekama samu na kusimbisa tala-tala na kisika ya yawu. Mpe kisanola mosi ya ntama ya kisengo ya mpembe vwandaka kuna. Bantu yikwa me monaka ntete kisanuna yina me salema na kisengo ya ntama. . . kisanuna mosi ya ntama ya kisengo? Mu lenda mona yawu diaka.

³³ Mpe na yawu ya vwandaka na mwa mesa mosi samu na kusukula, mwa dibaya mosi kaka yina vwanda na dikulu ya kutekama na nsi ya yawu, ba komaka yawu na yinti. Mwa pompi mosi, ya ntama, yina vwanda basisa mwa masa ya sufulu, mpe beto vwanda sukula pene-pene ya yinti yango ya ntama. Mpe Mama vwanda baka basaki ya faline samu na kusala bisume. Nani awa me sadilaka ntete esume ya saki ya faline? Mbote, mu ke kukiwa na yinzo ya munu ntangu yayi. Mpe yawu ke bisume yina ya munene, ya kilo! Mpe ntangu ya vwanda sukula beto bana ya fioti, yandi vwanda. . . ya monanaka ti yandi vwanda katula mpusu ya nzutu ntangu ya vwanda pangusa beto. Mpe mu

ke bambuka moyo ya saki ya faline yina. Mpe ya vwanda benda mwa bansinga, samu na kusala mwa bankuti, samu na kukumisa yawu kitoko.

³⁴ Bantu yikwa me lalaka ntete na matela ya matiti? Mbote, beno—beno tala diambu! Bantu yikwa me zaba kuse yina ya avoine? Mbote, Mpangi Glover, mu ke na yinzo ya munu ntangu yayi, na ntembe ve! Matela ya matiti, mbote, ntama mingi ve kubanda mu ke ladilaka yawu ve, mpe yawu vwanda. . . Oh, ya ke—ya ke pesa mpongi ya mbote, ya ke na mwa madidi. Na yawu na nsungi ya madidi bawu vwanda baka bulanketi yina me salama na mansala ya bandeke mpe bawu vwanda tanda yawu na zulu ya yawu, beno zaba, mpe na manima bawu vwanda tula mwa kitini ya kapo na zulu samu na kufika beto samu yawu vwanda kotisa mvula-mpembe na madusu ya yinzo, beno zaba, kisika mwa mabaya ya fioti ya ntama vwanda ya kutekama, beno zaba, mpe mvula-mpembe lendaka kotila kuna. Mpe, oh, mu lenda bambuka yawu mbote-mbote.

³⁵ Mpe na yawu Papa vwanda na boloso ya mandefu. Munu. . . Ntangu yayi diambu yayi ke yitukisa beno. Yawu salamaka na mpusu ya masangu, boloso ya mandefu na mpusu ya masangu. Yandi vwanda baka sabuni ya mama ya bilele yina yandi salaka, mpe potaka yawu mpe kupakula yawu na kizizi ya yandi na boloso yayi ya mpusu ya masangu, mpe yandi vwanda zenga na yawu mandefu na lutebu yayi ya nene, yina vwanda na kisika ya kusimbila ya ntama. Mpe na Lumingu yandi vwanda baka mwa bitini ya papié, kubamba yawu pene-pene ya kole ya yandi, bawu vwanda lwata bakole ya kopale mpe vwanda tula yawu pene-pene ya kole mutindu yayi samu fulu-fulu kukangama ve na kole ya simisi ya yandi. Beno me monaka ntete muntu kusala yawu? Yinga, oh, la la, oh, la la!

³⁶ Mu ke bambuka moyo ya kiziba yina vwanda kuna na nsi, kisika beto vwanda kwenda nwa mwa masa, mpe beto vwanda baka masa ya beto na dibungu ya ntama ya nene. Bantu yikwa me monaka ntete dibungu ya nene? Mbote, bantu yikwa kati ya beno me katuka na Kentucky, na mutindu nionso? Yinga, mbote, beno tala munu beno bantu ya Kentucky. Mbote, oh, la la, mu ke—mu ke kaka. . . Mu banzaka ti bantu yayi nionso kele awa vwandaka na Oklahoma mpe ya Arkansas, kasi ya ke monaka ti Kentucky me banda na kuzinga na kizunga yayi. Mbote, bawu me mona petrole na Kentucky mwa bangonda fioti me luta, beno zaba, na yawu mbala yankaka bayankaka kati ya bawu ke kwisa vwanda na ndambu yayi.

³⁷ Mpe mu ke bambuka moyo na ntangu Tata vwanda kuma mpe kusukula na ntwala ya madia ya midi, yandi vwanda gumba bansongi ya simisi ya yandi, mpe na maboko ya yandi yayi ya kuvimba. Mpe na ntangu yandi vwanda telemisa maboko ya yandi samu na kusukula, kulosa masa na kizizi ya yandi, misisa vwanda vimba na mwa maboko ya yandi. Mpe mu tubaka,

“Beno zaba, tata ya munu ke zinga bamvula nkama mosi na makumi tanu.” Yandi vwanda na ngolo mingi! Kasi yandi fwaka na bamvula makumi tanu na zole. Beno me mona? “Awa beto ke na mbanza ya seko ve.” Ya kieleka. Beto lenda vwanda ya seko ve.

³⁸ Ntangu yayi beto sala mwa nzietelo, beto nionso. Muntu nionso kati ya beno awa kele na disolo ya luzingu, mutindu mosi na munu, mpe ya ke vwandaka mbote na kuvutuka na kati ya mabanza. Beno ke banza mutindu yina ve? Kuvutuka na manima, mpe beto nionso kuvutuka na manima na ntangu fioti, na banzingilu ya mutindu mosi na yina beto zingaka na ntangu beto vwandaka bana ya fioti.

³⁹ Mpe ntangu yayi kitini ya ntete ya disolo ya luzingu ya munu. Mu ke tubila yawu fioti, samu yawu kele na buku mpe mingi na kati ya beno kele na buku.

⁴⁰ Mu butukaka na mwa yinzo ya mongo, kuna na zulu ya miongo ya Kentucky. Beto vwanda zinga na yinzo ya kitini mosi, tapi vwandaka ve na nsi, ata mabaya vwandaka ve na nsi, ya vwandaka kaka ntoto ya mpamba. Mpe sinzi mosi ya yinti, kitini ya zulu yina ya kuzenga vwandaka na makulu tatu na zulu ya yawu, yawu yina vwandaka mesa ya beto. Mpe ba Branham nionso ya fioti-fioti vwanda tambama na kati mpe na nganda, mpe na ntwala ya mwa yinzo yango, mpe bawu vwanda potana na nganda, yawu vwanda kuma mutindu kisika nkonga ya ba-opossum me katuka kupotana na putulu, beno zaba, baleki nionso ya babakala. Beto vwandaka yivwa, mpe na leka mosi ya kento, mpe ya kieleka yandi vwanda mona mpasi na kati ya nkonga yina ya bana-babakala. Beto fwana zitisa yandi bubu yayi samu na mambu yina beto vwanda sala na bilumbu yina. Yandi lendaka kwenda na beto kisika mosi ve, beto vwanda vutula yandi na nswalu nionso, yandi vwanda mwana ya kento. Na yawu yandi lendaka kota ve, beno zaba. Na yawu beto vwanda . . . Mpe nionso . . .

⁴¹ Mu ke bambuka moyo ti kuna na manima ya mesa beto vwanda na bakiti zole, mpe yawu salamaka na mpusu ya yinti. Ba vukisaka mwa bayinti ya fioti ya hickory, mpe nsi ya yawu tungamaka na mpusu ya yinti ya hickory. Nani me monaka ntete kiti ya mpusu ya yinti ya hickory? Yinga. Mpe mu bandaka ntete kuwa ndinga ya Mama. Oh, na manima na yawu na ntangu beto kotaka na kisika yina ya lendaka vwanda na mabaya na nsi, ya vwanda nata bana ya fioti na nkata mutindu *yayi*, mpe kuningisa-ningisa kiti yango mpe ya vwanda dila mba, mba, mba na nsi. Mpe mu ke bambuka moyo samu na kukeba baleki na kubasika na nganda ve, ntangu ya vwanda sukula bilele to kusala kima mosi, ya vwanda tula kiti mpe kutekimisa yawu na kielo, samu na kukeba baleki na kubasika na ntangu ya vwanda kwenda sosa masa na yinto, mpe nionso yina.

42 Mpe Mama vwanda na bamvula kumi tanu na ntangu mu butukaka, Papa vwanda na bamvula kuna na nana. Mpe mu vwanda mwana ya ntete na kati ya bana yivwa. Mpe ba tubaka na munu ti na suka yina mu butukaka . . .

43 Ntangu yayi, beto vwandaka bamputu ya kieleka, bumputu ya kieleka na kati ya bumputu nionso. Mpe beto vwanda ata na nela mosi ve na mwa yinzo yango ya bayinti. Ya vwanda na mwa kielo mosi ya mabaya yina beto vwanda zibula. Mu ke ndima ve ti beno me monaka ntete kima ya mutindu yina. Mwa kielo mosi ya mosi ya mabaya yina vwanda zibuka na kisika ya nela mosi, beto vwanda bika yawu ya kuzibuka na mwini mpe beto vwanda kanga yawu na mpimpa. Beto lendaka pelisa bamwinda ya kura ve to ata kuyoka petrole ve na bilumbu yina, beto vwanda na yina ba ke bokilaka “mwinda ya mafuta.” Ntangu yayi, mu zabaka ve yina vwandaka mwinda ya mafuta. Yinki beno . . . Mpe beno me sumbaka ntete . . . kuyoka ditutu ya yinti ya tidala? Baka ditutu ya yinti ya tidala mpe pelisa yawu mpe tula yawu na zulu ya kifiniku, yawu ke pela. Mpe yina kele . . . ya vwanda basisa mwa midinga, kasi bawu vwanda na bima ya yinzo ve, na mutindu nionso, samu na kubasisa midinga. Na yina ya ke kaka . . . yinzo yango ya bayinti vwanda kuma ndombe na midinga. Ya vwanda benda midinga mbote samu kisika vwanda ya nene na zulu ya muludi samu na kubenda midinga. Na yawu . . .

44 Mpe mu butukaka na kilumbu ya 6 ya Ngonda ya yiya, 1909. Mpamba ve, beno zaba, ya me sala ti mu me luta fioti bamvula makumi zole na tanu ntangu yayi. Mpe na yawu, na suka yina mu butukaka, Mama tubaka ti bawu zibulaka nela. Na yina, beto vwanda na badokotolo ve, kento mosi vwanda butisa. Kaka . . . Mpe kento yina vwanda butisa vwandaka nkooko ya munu ya kento. Mpe na yina na ntangu mu butukaka mpe kuboka ya munu ya ntete, mpe—mpe Mama zolaka mona mwana ya yandi. Mpe—mpe yandi mosi vwandaka kaka mwana ya fioti. Mpe na ntangu bawu zibulaka mwa nela yango, kaka na kutana ya suka, pene-pene ya ngunga tanu. Mpe . . . Nkundi yayi rouge-gorge vwandaka pene-pene ya mwa matiti. Mutindu beno nionso me monaka foto ya yawu na kati—na kati ya buku ya disolo ya luzingu ya munu. Rouge-gorge mosi vwanda kuna mpe ya vwanda yimbila na ndinga ya ngolo.

45 Mu ke zolaka ba rouge-gorge ntangu nionso. Ntangu yayi, beno bantwenia ya babakala ke landa na radio, beno fwa bandeke ya munu ve. Beno tala, bawu kele—bawu kele—bawu kele . . . Bawu kele bandeke ya munu. Beno me waka ntete lisapo ya rouge-gorge, yinki mutindu yandi me kumaka na ntulu ya mbwaki? Mu ke telema fioti awa. Yinki mutindu yandi me kumaka na ntulu ya mbwaki . . . Kilumbu mosi Ntinu ya bantinu vwandaka kufwa na Kulunsi, mpe Yandi vwandaka mona mpasi mpe muntu mosi ve zolaka kwisa na Yandi. Yandi vwanda na muntu ya kusadisa Yandi ve. Mpe mwa ndeke mosi ya ntinta

ya café zolaka katula banonso yango na Kulunsi, mpe yandi vwanda pumbuka ntangu nionso na Kulunsi mpe vwanda benda banonso yango. Yandi vwandaka fioti mingi samu na kubenda yawu, mpe ntulu ya yandi nionso kumaka mbwaki na menga. Mpe kubanda ntangu yina ntulu ya yandi me kumaka mbwaki. Beno fwa yawu ve, bantwenia ya babakala. Beno bika yandi swi.

⁴⁶ Yandi vwanda pene-pene ya nela, ke yimbila kaka mutindu ba rouge-gorge ke yimbilaka. Mpe—mpe Papa zibulaka nela. Mpe na ntangu bawu zibulaka mwa kielo-nela yango, Nsemo yina beno ke mona na foto kotaka na nela na kubalukaka, mutindu mama tubaka, mpe yawu telemaka na zulu ya mbeto. Nkooko ya kento zabaka ve diambu ya kutuba.

⁴⁷ Ntangu yayi, beto kele...beto vwandaka ve dibuta ya basambidi. Dibuta ya munu vwanda bandimi ya Catholique. Mu ke Irlandais na bandambu nionso zole. Tata ya munu kele Irlandais ya muvimba, Branham. Mama ya munu kele Harvey; kaka, tata ya yandi kwelaka Cherokee Indien, mpe yina zengaka mwa dikanda ya menga ya ba Irlandais. Mpe Papa na Mama vwandaka kwenda na yinzo-Nzambi ve, mpe bawu kwelanaka na yinzo-Nzambi ve mpe bawu vwanda na nsambulu mosi ve. Mpe kuna na miongo vwandaka ata na dibuundu ya Catholique ve. Na yawu bawu kwisaka awa na banzenza ya ntete, ba Branham zole kwisaka awa, na nzila ya bawu dikanda ya Branham me butuka; yawu yina dikanda ya dibuta.

⁴⁸ Mpe na ntangu yandi zibulaka... Na ntangu bawu zibulaka nela yayi mpe Nsemo yayi vwandaka kunana kati ya yinzo, bawu zabaka ve yinki kusala. Papa sumbilaka yandi (Mama tubaka) salopette ya malu-malu samu na nkinzi yayi. Yandi vwanda ya kutelema na...ya kotisaka maboko ya yandi na ntulu ya salopette ya yandi, mutindu bantu ya mfinda mpe bazengi-bayinti vwanda lwata na bilumbu yina. Mpe yawu bangisaka bawu.

⁴⁹ Mbote, na ntangu mu lungisaka mbala yankaka bilumbu kumi, to pene-pene ya yawu, bawu nataka munu na mwa yinzo-Nzambi mosi ya ba Baptiste yina ba bokilaka “Kimfumu ya ba Opossum,” dibuundu ya ba Baptiste ya Kimfumu ya ba Opossum. Yawu yina nkumbu ya yawu. Kuvwandaka na kizieti mosi ya longi mosi ya kiboba, longi mosi ya Baptiste ya mambu ya ntama vwandaka luta kuna pene ya mbala mosi na bangonda zole. Na...Bantu vwanda vukana kuna samu na lukutakanu mosi, bawu vwanda kwenda yimbila mwa mikunga, kasi bawu vwanda wa dilongi na ntangu kizieti ya longi yayi vwandaka luta. Bawu vwanda futa yandi konso mvula na saki ya bambuma pumpkin mpe mwa bima ya mutindu yina, beno zaba, yina bantu vwanda kuna samu na kupesa yandi. Mpe na yawu kiboba ya longi yayi kwisaka kuna, mpe yandi sambilaka samu na munu kuna na ntangu mu vwanda mwana ya fioti. Yina vwandaka nzietelo ya munu ya ntete na yinzo-Nzambi.

⁵⁰ Mpe ntangu mu kumaka na bamvula pene-pene ya . . . mwa ntangu fioti na manima ya bamvula zole, mu monaka vision ya ntete.

⁵¹ Mbote, nsangu panzanaka kuna na miongo ti Nsemo yayi kotaka. Na yawu bawu mekaka na kutendula diambu. Bayankaka na kati ya bawu tubaka ti ya fwana vwanda nsemo ya mwini yina bulaka kitala-tala na kati ya yinzo. Kasi ata kitala-tala mosi ve vwandaka na kati ya yinzo. Mpe mwini vwanda me basika ntete ve, na yawu ya vwanda na suka-suka, na ngunga tanu. Mpe na manima, oh, bawu monaka Yawu kaka mpamba. Mpe na ntangu mu kumaka na bamvula pene-pene. . . mu banza pene-pene ya bamvula tatu. . .

⁵² Ntangu yayi, mu fwana vwanda ya kusungama. Kele na bima awa yina mu zola tuba ve, mpe mu ke sepela kuluta na lweka ya yawu mpe kutuba yawu ve. Kasi ntete, samu kutuba kieleka, beno fwana tuba kieleka kana ya ke samu na beno mosi to bantu yankaka. Beno vwanda ya kusungama samu na yawu, mpe ya ke vwanda ntangu nionso mutindu mosi.

⁵³ Tata ya munu vwandaka ata fioti ve pene ya musambidi. Yandi vwanda mbandu ya bantu ya mongo yina vwanda nwa malafu mbala na mbala, ntangu nionso. Mpe yandi kotaka na mwa bampasi ya bitumba, mpe yina bantu zole to tatu zolaka kufwa na ntangu bawu vwanda nwana, kubulana masasi, mpe kupampana na bambele mosi na yankaka, na feti mosi kuna na zulu ya miongo. Mpe Papa vwandaka mosi ya bayina bandaka bitumba yayi, samu ba lwadisaka nkundi ya yandi, mpe yandi bulaka muntu mosi kiti. Mpe ya vwandaka. . . Bakala yango basisaka mbele mpe zolaka zenga na mbele yango nkundi ya Papa yina lalaka na ntoto, na ntima, mpe Papa kotilaka yandi. Mpe ya vwandaka bitumba mosi ya nene, samu bawu, kubanda kuna na Burkesville, ntama kuna ya ba-kilometres mingi kabulaka bawu, bawu tindaka kapita mosi na mpunda, samu na kukanga Papa.

⁵⁴ Na yawu bakala yango tandamaka kuna pene-pene ya lufwa. Mbala yankaka mpangi ya yandi mosi kele na kuwa yayi. Mu ke bokila nkumbu ya yandi, nkumbu ya yandi vwandaka Will Yarbrough. Mbala yankaka. . . Mu banza bayankaka kele na Californie, bana ya yandi ya yankaka ya babakala. Kasi yandi vwandaka kingolo-ngolo, bakala mosi ya ngolo mingi, yandi fwaka mwana ya yandi ya bakala na kisengo ya lupangu. Na yawu yandi—yandi vwanda bakala mosi ya ngolo mingi mpe ya nku. Mpe ya vwandaka na bitumba mosi ya nene ya bambele kati-kati ya yandi na Papa. Mpe ya bikalaka fioti tata ya munu kufwa bakala yango, na yawu ya lombaka ti yandi tina mpe yandi katuka na Kentucky mpe kuzabuka nzadi samu na kukwisa na Indiana.

55 Mpe yandi vwandaka na mpangi mosi ya bakala yina vwanda zinga, na ntangu yina, na Louisville, Kentucky, yandi vwanda kilandi ya ntwadisi na Kompani ya Kupasula Mabaya Fioti-fioti na Kentucky, na Louisville. Mpe na yawu Papa kwisaka samu na kukutana na mbuta ya yandi ya bakala. Papa vwandaka leki ya bana-babakala nionso, kati ya bana kumi na sambwadi. Mpe na yawu yandi kwisaka samu na kukutana na mbuta ya yandi ya bakala, mpe na ntangu yina yandi kwendaka samu na mvula ya muvimba. Yandi lendaka vutuka ve, samu bapulusu vwandaka sosa yandi. Mpe na yawu na ntangu beto waka nsangu ya yandi na nzila ya mukanda, yina yandi sonikaka na nkumbu yankaka, kasi yandi tubaka na Mama mutindu yandi lendaka kuwa bansangu ya yandi.

56 Mpe na manima kilumbu mosi mu ke bambuka moyo ya kiziba (mwa yinzo yango ya bayinti) vwandaka na manima ya yinzo. Mpe—mpe na ntangu yina na manima ya . . . Kele na yivwa. . . bangonda kumi na mosi kabulaka munu na mpangi ya munu ya bakala yina landaka munu, mpe yandi vwandaka komvula. Mpe mu vwanda na ditadi ya nene na diboko ya munu, mpe mu vwanda meka na kutalisa yandi mutindu mu lendaka losa ditadi yango na ngolo nionso kati na poto-poto, kisika kiziba me basikaka na ntoto mpe salaka poto-poto. Mpe mu waka ndeke mosi, mpe yawu vwanda yimbila na zulu ya yinti. Mpe mu talaka na zulu ya yinti yina mpe ndeke yango tinaka, mpe, na ntangu yawu tinaka, Ndinga mosi tubaka na munu.

57 Ntangu yayi, mu zaba ti beno ke banza ti mu lenda banza mpe kubambuka yawu ve. Kasi Mfumu Nzambi Yina kele Zuzi, ya ntoto mpe zulu mpe nionso yina kele, zaba ti mu ke tuba kieleka.

58 Ndeke yina, na ntangu yawu tinaka, Ndinga mosi katukaka kisika ndeke yango vwandaka na yinti, mutindu mupepe na kati ya matiti, mpe Yawu tubaka, “Nge ke zinga pene-pene ya mbanza mosi na nkumbu ya New Albany.” Mpe mu zingaka, kubanda na ntangu mu lungisaka bamvula tatu tii na ntangu yayi, na nsi ya ba-kilometre tanu ya New Albany, na Indiana.

59 Mu vutukaka na yinzo mpe tubaka yawu na mama ya munu. Mbote, yandi banzaka ti mu vwanda lota to kima ya mutindu yina.

60 Na manima beto kwendaka zinga na Indiana mpe Papa kwendaka sadila, Tata Wathen, bakala mosi ya mvwama. Yandi kele patron ya izine ya Malafu ya tiya ya Wathen. Mpe yandi vwandaka patron ya mbongo mingi ya bakompani ya nene; yandi ke na ba-million mingi, mpe mosi ya Bantu ya lukumu ya Louisville, mpe—mpe na baseball, mpe nionso yina. Mpe na yawu beto zingaka pene-pene kuna. Mpe mutindu Papa vwandaka mputu, kasi yandi lendaka ve kukondwa kunwa malafu, na yawu

yandi—yandi bandaka na kulamba lotoko na—na nzungu mosi ya nene.

⁶¹ Mpe na yawu mu monaka mpasi mingi samu mu vwandaka mbuta ya bana nionso. Ya lombaka ti mu nata masa na nzungu yango, samu batiyo yina kuvwanda na madidi na ntangu bawu vwandaka sala whisky. Na manima yandi bandaka kuteka yawu, mpe na yawu yandi bakaka banzungu yina zole to tatu. Ntangu yayi, yayi ke kitini yina mu ke zolaka ve kutuba, kasi yawu kele kieleka.

⁶² Mpe mu ke bambuka kilumbu mosi, mu katukaka na kibumbulu, mu vwanda kwenda na yinzo, ke dila. Samu kuna na manima ya yinzo kiziba mosi vwandaka kuna, yawu . . . sika wapi bawu vwanda zenga glace. Mingi kati ya beno ke bambuka moyo na ntangu bawu vwanda zenga glace mpe kutula yawu na kati ya putulu ya mabaya. Mbote, yina ke mutindu Tata Wathen vwanda bumba glace kuna na kati ya yinsi. Mpe Papa vwandaka chauffeur ya yandi, chauffeur ya yandi mosi. Mpe na ntangu . . . kiziba yango fulukaka na bambisi mpe ntangu bawu vwanda kwenda zenga glace kunatakunata yawu samu na kukotisa yawu na putulu ya mabaya, na manima na ntangu glace vwanda nienia mpe kukituka masa na nsungi ya été, mu banza ti yawu vwanda kuma bunkete, mingi mutindu glace ya dianga, mpe bawu lendaka sadila yawu, samu na kunwa ve, kasi samu masa kuvwanda ntangu nionso ya madidi, bawu vwanda tula yawu na bakantini ya bawu mpe miliki ya bawu, mpe nionso yina.

⁶³ Mpe kilumbu mosi mu katukaka kubaka masa na pompi, yina vwandaka pene-pene ya bala-bala yina landaka. Mu vwanda dila na muntu yina nionso zolaka kuwa munu, samu mu katukaka na lukolo mpe bana-babakala nionso kwendaka loba mbisi, na kiziba. Mu vwanda zola kuloba mbisi. Mpe na yawu bawu nionso kwendaka loba mbisi katula kaka munu, mpe mu fwanaka nata masa samu na nzungu yayi. Na ntembe ve, oh, ya lombaka kukanga yinwa, ya vwandaka musiku na ntangu yina. Mpe munu . . . Ya vwandaka ntangu ya mpasi. Mpe mu ke bambuka moyo ti mu vwanda tambula na mputa na musapi ya dikulu, mpe mu kangaka mususu ya disangu na nsi ya musapi ya dikulu ya munu samu na kukeba yawu na putulu. Beno me salaka yawu ntete? Tula kaka mususu ya disangu na nsi ya musapi ya dikulu ya nge mutindu *yayi* mpe kanga yawu na nsinga. Yawu ke telemisa musapi ya dikulu ya nge na zulu mutindu yintu ya kafulu, beno zaba, ke tala na zulu. Beno lendaka landa munu bisika nionso mu vwanda kwenda, na mususu ya disangu na nsi ya musapi ya dikulu ya munu; kisika mu lwalaka, beno zaba. Mu vwanda ve na basapatu ya kulwata. Na yawu beto vwanda lwata basapatu ve; ntangu yankaka na nsungi ya hiver. Kana beto lwataka basapatu, beto . . . ya vwandaka yina beto lendaka lokuta, yina muntu mosi lendaka pesa beto. Mpe bilele yina bantu vwandaka pesa beto, na luzolo ya bawu.

⁶⁴ Mpe mu telemaka na nsi ya yinti yango, mpe mu vwanda kuna ke dila kaka (ya vwandaka na Ngonda ya yivwa) samu mu zolaka kwenda loba mbisi, ya lombaka ti mu fulusa dilonga ya munene na mingi ya masa na mwa bakantini yina ba vwandaka tula sukadi, ya mwa yinda mutindu *yayi*, kati-kati ya ba-litre zole, samu mu vwanda kaka mwana ya fioti pene-pene ya bamvula sambwadi. Mpe mu vwanda tiamuna yawu na kati ya dilonga ya nene mpe na manima mu vwanda vutuka samu na kubaka bankatini yankaka zole mpe mu kwisa diaka, mu vwanda baka yawu na pompi. Yawu yina masa beto vwanda na yawu. Mpe na mpimpa yina bawu zolaka lamba nzungu yina ya muvimba ya lotoko ya masangu, babakala yayi na Papa, kuna na yinzo.

⁶⁵ Mpe mu vwanda dila, mpe na mbala mosi mu waka kima mosi ke sala makelele mutindu kitembo, kima mosi ya mutindu yayi (ntangu yayi, mu banza ti makelele ke ngolo mingi ve), ya vwanda sala “Wuuuuusssh, wuuuuusssh,” kaka makelele ya mutindu yina. Mbote, ntangu vwandaka swi mingi, mpe mu talaka bisika nionso. Beno zaba, mwa kitembo, mu banza ti beno ke bokilaka yawu mwa mipepe ya ngitukulu? Na automne na kati ya kilanga ya masangu ba ke lokutaka, beno zaba, matiti mpe nionso yina, na automne kuna, matiti bandaka na kusoba. Mpe mu vwandaka na nsi ya yinti ya nene ya peuplier ya mpembe, yina vwandaka pene-pene ya kati ya nzila katuka na kibumbulu kuna na yinzo. Mpe mu waka makelele yina. Mpe mu talaka bisika nionso, yawu vwandaka kaka swi mutindu ya kele na yinzo yayi. Ata dititi vwandaka ningana ve na kisika mosi, to kima mosi ve. Mpe mu banzaka, “Wapi ke katuka makelele yina?” Mbote, mu banzaka, “Ya fwana vwanda ntama na kisika yayi awa.” Mu vwanda kaka mwana ya fioti. Mpe makelele yango kumaka mingi mpe mingi diaka.

⁶⁶ Mu lokutaka mwa bankantini ya munu mpe mu dilaka mwa mingi diaka mpe mu bandaka na kuvutuka, mu vwanda pema. Mpe mu kwendaka fioti ntama na yawu na mwa bitamina na kisika yina, katuka na nsi ya mavala ya yinti yayi ya nene, mpe, oh, la la, yawu salaka makelele ya kitembo. Mpe mu balukaka samu na kutala, mpe ya vwandaka na kitembo yankaka pene-pene ya kati-kati ya yinda ya yinti yina, na kati ya yinti yina ya vwandaka baluka mpe ke baluka, na kuningisaka matiti yina. Mbote, mu banzaka ve kima mosi ya ngitukulu samu na yawu samu ya ke kaka na nsungi yina ya mvula, mpe na automne, mpamba ve, bitembo yina ke salamaka. Mwa . . . Beto ke bokilaka yawu “bitembo.” Mpe yawu—mpe yawu ke zangulaka putulu. Beno me monaka yawu mutindu yina na ntoto ya kuyuma. Kima ya mutindu mosi. Na yawu mu vwanda tala yawu, kasi yawu vwanda kwenda ve. Na mumesanu ya ke pepaka kaka mwa ntangu fioti, na manima yawu kwenda, kasi yawu vwandaka kaka kuna baminuti zole to kuluta.

67 Mbote, mu bandaka diaka na kuvutuka. Mpe mu balukaka diaka samu na kutala yawu. Mpe kaka na ntangu Yina, Ndinga ya muntu mosi wakanaka mutindu mosi na ya munu, mpe tubaka, “Kunwa malafu ata fioti ve, kunwa makaya ve, kutula mvindu ata fioti ve na nzutu ya nge. Ke vwanda na kisalu ya kusala na nge na ntangu nge ke kuma mbuta.” Na yawu, yawu salaka mutindu yawu bangisa munu na kufwa! Beno lenda mbanza mutindu mwana ya fioti lendaka kuwa. Mu bwisaka bankantini yina, mpe mu kwendaka na yinzo na mbangu nionso, mpe mu vwanda boka na ndinga ya ngolo.

68 Mpe ba-vipere ya mbwaki vwandaka na kizunga yina, banioka, mpe ya ke vwandaka na ndikila ya ngolo. Mama banzaka ti, na ntangu mu vwanda luta na disamba mbala yankaka mu kitisaka dikulu ya munu na zulu ya vipere ya mbwaki mpe yandi kwisaka na nswalu nionso samu na kukutana na munu. Mpe mu pamukaka na maboko ya yandi, mu vwanda boka, mu kangaka yandi ngolo mpe yambaka yandi. Mpe yandi tubaka, “Yinki diambu, nioka me tatika nge?” Yandi talaka munu bisika nionso.

Mu tubaka, “Ve, Mama! Kele na muntu mosi na zulu ya yinti yina kuna.”

69 Mpe yandi tubaka, “Oh, Billy, Billy! Yinki nge zola tuba na munu?” Mpe yandi tubaka, “Nge telemaka samu na kulala?”

70 Mu tubaka, “Ve, mama! Kele na muntu mosi kuna na zulu ya yinti, mpe Yandi tubaka na munu na kunwa malafu ve mpe na kunwa makaya ve.”

71 “Kunwa whisky mpe—mpe bima ya mutindu yina.” Mpe mu vwanda nata masa na nzungu yina ya munene yina ba ke lambilaka malafu, na ntangu mosi yina. Mpe Yandi tubaka, “Kunwa malafu ata fioti ve to kutula mvindu ve na nzutu ya nge ata fioti ve.” Yina ke luzingu ya mansoni, beno zaba, mpe bumwana ya munu. . . buleki ya munu na bakento. Mpe na luzingu ya munu nionso, mu me bwaka ata fioti ve na mambu ya mutindu yayi. Mfumu sadisaka munu na mambu yina, mpe mutindu beno ke mona yawu mutindu beto ke kwenda na ntwala. Mpamba ve na yawu, “Kunwa malafu ve to kunwa makaya ve, to kutula mvindu ve na nzutu ya nge, samu ke vwanda na kisalu ya kusala na nge na ntangu nge ke kuma mbuta.”

72 Mbote, mu tubaka yawu na Mama, mpe—mpe yandi sekaka munu kaka. Mpe mu vwandaka kaka kukiya diaka ve. Yandi bokilaka dokotolo, mpe dokotolo tubaka, “Mbote, yandi ke kaka na ntima ya nkufi, yimeni.” Na yawu yandi tulaka munu na mbeto. Mpe ata fioti ve, kubanda kilumbu yina tii bubu yayi, mu me lutaka diaka ve pene-pene ya yinti yina. Mu vwanda banga. Mu bandaka na kulutila na lweka yina yankaka ya disamba, samu mu banzaka ti kuna vwandaka na muntu mosi na zulu ya

yinti yina mpe Yandi vwanda tuba na munu, Ndinga ya nene yina wwandaka kutuba.

⁷³ Mpe na yawu mwa ntangu fioti pene-pene ya ngonda mosi na manima ya yina, mu vwanda bula bile na nganda na baleki ya munu ya babakala, na ntwala ya yinzo. Mpe na mbala mosi mu kukiwaka mutindu yankaka. Mpe mu bikaka mpe mu wwandaka pene-pene ya yinti mosi. Mpe beto wwandaka na dibungu pene-pene ya Nzadi Ohio. Mpe mu talaka kuna na ndambu ya Jeffersonville, mpe mu monaka kiamvu mosi kumata mpe kuzabuka, nzadi, kuluta na zulu ya nzadi. Mpe mu monaka bantu kumi na sambanu (mu tangaka bawu) yina kubwaka kuna mpe zimbisaka baluzingu ya bawu na zulu ya kiamvu yina. Mu vutukaka na nswalu nionso mpe tubaka yawu na mama ya munu, mpe yandi banzaka ti mu me katuka na kulala mpongi. Kasi bawu zimbanaka yawu ve, mpe bamvula makumi zole na zole na manima ya yina Kiamvu ya Commune ntangu yayi (yina mingi kati ya beno ke zabukaka na ntangu beno ke zabukaka kuna) zabukaka nzadi na kisika mosi yina, mpe bantu kumi na sambanu kufwaka na ntangu ba vwanda tunga kiamvu yina na zulu ya nzadi.

⁷⁴ Ya me bwaka ata fioti ve na kuvwanda kieleka ya kulunga. Mutindu beno ke mona Yawu awa na kati ya yinzo yayi, Yawu wwandaka kaka mutindu yina konso ntangu.

⁷⁵ Ntangu yayi, bawu banzaka ti mu wwandaka na ntima ya nkufi. Na yina, mu ke muntu ya ntima ya nkufi, ya kieleka. Mpe, kana beno me bakulaka yawu, bantu yina ke wwandaka—vwandaka na kiyeka ya kuvwanda bantu ya kimpeve ke wwandaka na ntima ya nkufi.

⁷⁶ Beno tala ba-poète mpe baprofete. Mpe beno tala William Cowper yina sonikaka mukunga yina me zabana mingi, “Kele na kiziba mosi ya kifuluka na Menga, yina basikaka na misisa ya Emmanuel.” Beno me . . . Beno zaba mukunga yango. Mu telemaka pene-pene ya ntoni ya yandi ntama mingi ve. Mpangi Julius, mu banza, mu zaba ve, ve . . . yinga, ya kieleka, ya wwandaka na beto kuna na ntoni ya yandi. Mpe—mpe kuna, na manima yandi sonikaka mukunga yina, lutwadusu ya kimpeve bikaka yandi, yandi kumaka kusosa nzadi samu yandi kukifwa. Beno me mona, Mpeve bikaka yandi. Mpe bantu mutindu ba-poète mpe bansoniki mpe . . . to ve . . . Baprofete mu zolaka tuba.

⁷⁷ Beno tala Elie, na ntangu yandi telemaka na zulu ya mingo mpe kulumusaka tiya katuka na zulu mpe kulumusaka mvula katuka na zulu. Na manima ntangu Mpeve bikaka yandi, yandi tinaka samu kento mosi kanaka yandi. Mpe Nzambi kukutaka yandi kuna ya kubumbana na kati ya caverne, na manima bilumbu makumi yiya.

⁷⁸ Beno tala Jonas, yandi vwanda na mingi ya lutwadusu ya kimpeve na ntangu Mfumu pakulaka yandi samu na kulonga

kuna na Ninive, tii kuna mbanza mosi na yinda ya Santu Louis balulaka ntima na kulwataka ngoto. Na manima na ntangu Mpeve bikaka yandi, yinki salaminaka yandi? Na manima Mpeve bikaka yandi, beto ke mona yandi na zulu ya mongo ke sambila ti Nzambi kubaka luzingu ya yandi. Mpe, beno me mona, ya ke lutwadusu ya kimpeve. Mpe ntangu mambu yina ke salama, ya—ya ke sala kima mosi na beno.

⁷⁹ Mpe diaka mu ke bambuka moyo mu me kuma mbuta. Mu me kuma ntwenia ya bakala. (Mu ke sala nswalu samu na kumanisa na mwa ntangu fioti.) Ntangu mu kumaka toko ya bakala mu vwandaka na mabanza ya mutindu mosi na batoko nionso. Munu . . . vwanda kwenda na lukolo, mu kutanaka na bantwenia ya bakento. Beno zaba, mu vwandaka muntu ya nsoni mingi, beno zaba. Mpe nsuka-nsuka mu—mu kuzwaka nkundi mosi ya kento. Mpe mu vwanda kaka mutindu bana-babakala nionso, ya bamvula pene-pene ya kumi na tanu, mu banza. Mpe—mpe na yawu, oh, yandi vwandaka kitoko. Oh, la la, yandi vwandaka na meso mutindu ya yembe, mpe yandi vwandaka na meno mutindu ya mangidiki, mpe nkingu mutindu dibata ya masa, mpe yandi—yandi vwandaka kitoko mingi.

⁸⁰ Mpe mwana-bakala yankaka ya fioti, yandi . . . beto vwandaka bankundi, na yawu yandi bakaka tomabilu Ford model-T ya ntama yina ya tata ya yandi, mpe beto silanaka na kukutana na bankundi ya beto ya bakento. Beto zolaka basika na bawu, na tomabilu. Beto vwandaka na mbongo ya kusumba pene-pene ya ba-litre nana ya essence. Ya lombaka ti beto nanguna pine ya manima samu na kupelisa yawu na manivele. Mu zaba ve kana beno ke bambuka yawu to ve, beno zaba, samu na kupelisa yawu na manivele. Kasi mambu—mambu vwanda tambula mwa mbote samu na beto.

⁸¹ Na yawu mu vwanda na mwa mbongo ya bisengo na poketi ya munu, mpe beto telemaka na mwa kisika mosi samu na kusumba . . . nge lendaka sumba sandwich na ba-cent tanu. Mpe na yawu, oh, mu vwandaka mvwama, mu lendaka sumba yawu yiya ya muvimba! Beno me mona? Mpe na manima beto diaka ba-sandwich mpe beto nwaka Coca, mu kwendaka vutula milangi. Mpe diambu ya ngitukulu, na ntangu mu basikaka, (na ntangu yina bakento bandaka na kubwa katuka na lemvo, to katuka na bukento) mwa yembe ya munu vwandaka kunwa dikaya.

⁸² Mbote, mu ke vwandaka ntangu nionso na mutindu ya munu ya kumona mambu na yina me tadila kento yayi ke nwaka makaya, mpe mu me sobaka ve mabanza kubanda na ntangu yina. Ya kieleka. Yina ke kima ya nsoni mingi yandi salaka. Mpe yina kele kieleka. Mpe mu—mu banzaka ti munu . . . Mbote, kompani ya makaya lendaka landila munu samu na yawu, kasi, mu ke tuba na beno, ya kele diambu yina diabulu salaka. Mu lenda ndima ti mwana ya munu ya bakala kuvwanda kinwa-

malafu na kisika kuvwanda kinwa-makaya. Ya ke na kima mosi ve na yinsi yayi ke fwaka mpe ke bebisaka kulutila yayi. Ya kieleka. Mu lenda ndima kumona kento ya munu ya kulala na ntoto, ya kulawuka malafu, na kisika kumona yandi na dikaya mosi. Tala yinki mutindu . . .

⁸³ Mpamba ve, Mpeve yayi ya Nzambi kele na munu, kana ya kieleka Yawu kele Mpeve ya Nzambi (beno lenda kukiyufula), beno yina ke kunwaka makaya beno kele na mwa siansi fioti na kubasika kuna, samu yayi. . . konso ntangu. Beno ke bakula na kisika ya malongi, mutindu Yandi ke fundisa yawu. Yawu ke kima mosi ya yimbi mingi. Beno simba yawu ve. Bamama, kana beno me salaka yawu, na lemvo ya beno, na Nkumbu ya Klisto, beno simba yawu diaka ve! Yina ke bebisa mavimpi ya beno. Yawu ke fwa beno. Ya ke . . . Yina ke—yina ke cancer beno ke lokuta.

⁸⁴ Badokotolo ke meka na kukebisa beno. Kasi kuyituka bawu ke tekila beno kima yango! Kana beno kwenda na famasi mpe beno tuba, “Kusumba . . . mu zola sumba cancer ya cent makumi tanu.” Beto tala, ba ke kwisa kanga bantu yina. Kasi na ntangu beno ke sumba makaya ya cent makumi tanu, beno ke sumba kima ya mutindu mosi. Badokotolo ke tubaka mutindu yina. Oh, yinsi yayi na mpusa ya mbongo. Mawa mingi. Yawu ke fwaka. Yawu me talisama pwelele.

⁸⁵ Mbote, na ntangu mu monaka mwana-kento yayi ya kitoko ya ntwenia yina vwanda kukitalisa, na mwa dikaya na diboko ya yandi, yina zolaka kufwa munu, samu mu vwandaka banza ti mu zolaka yandi. Mpe mu banzaka, “Na yawu . . .”

⁸⁶ Tala, ba bokilaka munu “muntu ke yinaka bakento,” beno zaba yawu, samu na ntangu nionso mu ke teleminaka fioti bakento, kasi mu ke teleminaka beno Bampangi-bakento ve. Mu ke teleminaka mutindu bakento ya bilumbu yayi kele na kuzinga. Ya kieleka. Beno fwana kusadisa bakento yayi ya mbote.

⁸⁷ Kasi mu lenda bambuka moyo na ntangu yina nzungu ya malafu ya tata ya munu vwanda sala, ya lomabaka ti mu vwanda kuna samu na kunata masa mpe bima yankaka, kumona bantwenia ya bakento yayi vwandaka na bamvula kuluta kumi na sambwadi ve, kumi na nana ve, kuna na babakala ya bamvula ya munu ntangu yayi, bawu me lawuka malafu. Mpe ya lombaka ti bawu manisa bawu kulawuka malafu yina mpe kupesa bawu café ya kukondwa miliki, samu bawu vutuka na bayinzo samu na kulambila babakala ya bawu madia ya nkokila. Oh, diambu ya mutindu yina, mu tubaka, “Munu . . .” Dikebi ya munu na nsungi yina vwandaka mutindu yayi, “Ya ke na mfunu ve na kubebisa disasi ya kitoko samu na kufwa bawu.” Ya kieleka. Mpe mu vwandaka kuyina bakento. Ya kieleka. Ya lombaka ti mu sala

keba na luzingu ya munu nionso ntangu yayi, samu mu landa na kubanza mabanza ya mutindu yina ve.

⁸⁸ Na yawu, na kutala mbote, kento ya mbote kele ditadi ya ntalu na yimpu ya kimfumu ya bakala. Ba fwana pesa yandi lukumu. Yandi. . . Mama ya munu kele kento, kento ya munu kele mutindu mosi, mpe bawu kele na nkadulu ya mbote. Mu kele mpe na mafunda ya bampangi-bakento ya Baklisto yina mu ke na kuzitisa mingi. Kasi kana—kana bawu lenda zitisa yina Nzambi me sala bawu, bumama mpe kento ya lukumu, yawu kele mbote. Yandi kele mosi ya makabu yina me luta mbote yina Nzambi lendaka pesa na bakala, yawu kele kento. Na nganda ya mpulusu, kento kele dikabu yina me luta mbote mingi kana yandi kele kento ya mbote. Kasi kana yandi kele kento ya mbote ve, Salomon tubaka, “Kento ya mbote kele ditadi ya ntalu na yimpu ya kimfumu ya bakala, kasi yayi ya yimbi to yayi ya mbote ve kele masa na kati ya menga ya yandi.” Mpe ya ke mutindu yina, yawu yina kele ya kulutula yimbi yina lendaka salama. Na yawu kento ya mbote. . . Kana nge kele na kento ya mbote, mpangi-bakala, nge fwana pesa yandi luzingu ya zulu mingi. Ya ke mutindu yina, nge fwana sala mutindu yina. Kento yayi ya kieleka! Mpe, bana, kana beno kele na mama yayi ya kieleka yayi ke bikalaka na yinzo mpe ke meka na kukeba beno, kusukula bilele ya beno, kutinda beno na lukolo, kutalisa na beno mambu yina me tadila Yesu, beno fwana zitisa mama ya mbote yina na ntima ya muvimba. Beno fwana zitisa kento yina, yinga, tata, samu yandi kele mama ya kieleka.

⁸⁹ Ba ke zonzaka samu na kukondwa kulunguka yina kele na miongo ya Kentucky. Beno ke monaka yawu na masolo yayi me tadila basenzi yayi awa. Biboba ya bamama yina kuna lendaka kwisa awa na Hollywood samu na kutalisa beno bamama ya bilumbu yayi mutindu ya kusansa bana ya beno. Mwana ya yandi kumeka mbala mosi kuvutuka na yinzo na mpimpa nsuki nionso ya kupanzana, mpe bikobo. . . na butesi, (yinki beno ke bokilaka yawu?) bima yayi ba ke pakulaka na kizizi, na sapatu ya yandi yina me niefwama na lweka mosi, na manima ya yandi kulutisa mpimpa ya muvimba na nganda, ya kulawuka malafu, mpangi-bakala, yandi ke bukila yandi divala mosi ya yinti ya hickory mpe mwana yina ke basika diaka ve. Mu ke tuba na beno, yandi ke. . . Mpe kana beno vwandaka na mwa mutindu yina kulutula fioti, beno lendaka vwanda na Hollywood mosi ya mbote mingi na lweka ya beno awa, mpe yinsi mosi ya mbote mingi. Ya ke mutindu yina. Ya kieleka. “Meka ntete kuvwanda muntu ya bilumbu yayi,” yina—yina kele mosi ya mayele ya yimbi ya diabulu.

⁹⁰ Ntangu yayi, mwana-kento yayi ya ntwenia, ntangu mu talaka yandi, ntima ya munu lwalaka. Mpe mu banzaka, “Mwana yayi mawa.”

Mpe yandi tubaka, “Oh, nge zola dikaya, Billy?”

Mu tubaka, “Ve, mama.” Mu tubaka, “Mu ke nwaka makaya ve.”

⁹¹ Yandi tubaka, “Ntangu yayi, ya tubaka ti nge ke kinaka ve.” Bawu zolaka kwenda kukina kasi mu zolaka kusala yawu ve. Na yawu bawu tubaka ti kisika mosi ya makinu vwandaka kuna, na kisika yina bawu vwandaka bokila Sycamore Gardens.

Mpe mu tubaka, “Ve, mu ke kina ve.”

⁹² Yandi tubaka, “Ntangu yayi, nge ke kinaka ve, nge ke nwaka makaya ve, nge ke nwaka malafu ve. Yinki ke sepelisaka nge?”

⁹³ Mu tubaka, “Mbote, mu ke zolaka kuloba mpe mu ke zolaka kuzomba.” Yina sepelisaka yandi ve.

Na yawu yandi tubaka, “Baka dikaya yayi.”

Mpe mu tubaka, “Ve, mama, matondo na nge. Mu ke nwaka makaya ve.”

⁹⁴ Mpe mu vwandaka na zulu ya kinzanza yina ke fikaka piné. Ba-Ford yina ya ntama vwandaka na kiniatinu, beno ke bambuka moyo, mpe mu vwandaka na zulu ya kinzanza yina ke fikaka piné na lweka, beto vwandaka na kiti ya manima, munu na yandi. Mpe yandi tubaka, “Nge zola tuba ti nge ke nwa dikaya ve?” Yandi tubaka, “Beto bana-bakento kele na kikesa mingi kulutila nge.”

Mu tubaka, “Ve, mama, mu ke kwikila ve ti mu ke na nsatu ya kusala yawu.”

⁹⁵ Yandi tubaka, “Ee, nge poule mouillée ya nene!” Oh, la la! Mu zolaka vwanda engambe Bill muntu ya yimbi, na yawu mu—mu zolaka ata fioti ve kuvwanda mutindu poule mouillée. Beno me mona, mu zolaka kuvwanda boxeur ya kieleka, yawu yina mu vwandaka banza samu na luzingu ya munu. Na yawu mu tubaka . . . “Poule mouillée! Poule mouillée!”

⁹⁶ Mu lendaka ndima yawu ve, na yawu mu tubaka, “Pesa munu yawu!” Mu tandaka diboko, mu tubaka, “Mu ke talisa na yandi kana mu ke poule mouillée to ve.” Mu bakaka dikaya yango mpe mu bandaka na kupelisa alimeti. Na yina, mu zaba ti beno . . . Ntangu yayi, mu ke na kizitu ve ya yina beno ke na kubanza, mu ke na kizitu ya kutuba kieleka. Ntangu mu zolaka pelisa dikaya yango, mu vwandaka na lukanu ya kunwa yawu mutindu mosi mu ke na lukanu ya kubaka Biblia yayi, beno me mona, mu waka kima mosi salaka, “Wuuuussssh!” Mu mekaka diaka, mu lendaka tula yawu na yinwa ve. Mu bandaka na kudila, mu losaka yawu na ntoto. Bawu bandaka na kuseka munu. Mu vutukaka na yinzo na makulu, mu zabukaka disamba, mu vwandaka na nganda, mu vwanda dila. Mpe—mpe ya vwandaka luzingu mosi ya mpasi.

⁹⁷ Mu ke bambuka moyo kilumbu mosi Papa vwandaka kwenda na nzadi kintwadi na bana-babakala. Munu na mpangi ya munu ya bakala, beto zolaka kota na masuwa mpe kutambula pene-

pene ya nzadi, samu kusosa milangi ya kutula lotoko. Bawu vwandaka futa beto cent tanu samu na milangi kumi na zole, kulokuta yawu pene-pene ya nzadi. Papa vwandaka kintwadi na munu, mpe yandi vwandaka na mosi ya milangi yina ya fioti ya plat. . . mu banza ti yawu vwandaka fuluka na ba-litre mosi na zulu ya yiya. Mupepe bwisaka yinti mosi, mpe Papa . . . Mpe bakala yayi vwandaka na yandi, Tata Dornbush. Mu vwandaka na . . . Yandi vwandaka na masuwa ya kitoko, na yawu mu zolaka ti mu sepelisa yandi samu mu zolaka sadila masuwa yango. Yina ya yandi vwandaka na yenda ya mbote kasi yina ya munu vwandaka na yenda mosi ve. Beto vwandaka kaka na mabaya ya ntama samu na kuluka na yawu. Mpe kana ya pesaka munu muswa ti mu sadila masuwa yina . . . Na yawu, ya vwandaka sala kisalu ya kutunga bisengo mpe ya sadilaka Papa banzungu ya nene. Na yawu yandi. . . Bawu vwandaka na zulu ya yinti yina, mpe Papa basisaka mulangi ya fioti ya plat ya whisky na poketi ya yandi ya manima, ya pesaka yandi yawu mpe yandi nwaka fioti, ya vutulaka yawu na Papa mpe yandi nwaka fioti, mpe kitisaka yawu na zulu ya mwana ya yinti mosi basikaka na lweka ya yinti yayi kubwaka. Na yawu Tata Dornbush bakaka yawu, mpe yandi tubaka, “Yawu yayi, Billy.”

Mu tubaka, “Matondo na nge, mu ke kunwaka malafu ve.”

⁹⁸ Yandi tubaka, “Branham mosi, mpe yina ke nwaka malafu ve?” Bawu nionso kufwaka lufwa mosi ya wonga mpenza. Mpe yandi tubaka, “Branham mosi, ke nwaka malafu ve?”

Mu tubaka, “Ve, tata.”

“Ve,” Papa tubaka, “Mu me sansa poule mouillée.”

⁹⁹ Papa ya munu bokilaka munu poule mouillée! Mu tubaka, “Pesa munu mulangi yina!” Mu katulaka kifinuku ya mulangi, mu bakaka lukanu ya kunwa yawu, mpe mu bandaka na kutombula yawu, “Wuuuuusssh!” Mu vutulaka mulangi mpe mu bakaka ntinu na kati ya disamba na ngolo nionso, ke dila. Kima mosi vwandaka zola ve ti mu sala yawu. Beno me mona? Mu lendaka tuba ve ti kima mosi ya mbote vwandaka na kati ya munu (mu bakaka lukanu ya kusala yawu), kasi yawu kele Nzambi, lemvo, lemvo ya ngitukulu yina kebaka munu ti mu sala mambu yayi ve. Mu zolaka sala yawu, munu mosi, kasi Yandi zolaka bika munu ve ti mu sala yawu.

¹⁰⁰ Na manima mu kutanaka na ntwenia mosi ya kento ntangu mu vwandaka na bamvula pene-pene ya makumi zole na zole, yandi vwandaka kitoko. Yandi vwandaka mwana-kento mosi ya ntwenia yina vwandaka kwenda na yinzo-Nzambi, Lutherienne ya Allemagne. Nkumbu ya yandi vwandaka Brumbach, B-r-u-m-b-a-c-h, yawu me katuka na nkumbu Brumbaugh. Mpe yandi vwandaka mwana-kento ya mbote. Yandi vwandaka kunwa malafu to makaya ve, mpe—mpe yandi vwanza kina ve to kima mosi ve, mwana-kento mosi ya mbote. Mu basikaka na yandi

na mwa ntangu fioti, mpe mu . . . Na manima, pene ya makumi zole na zole, mu zwaka mbongo yina me lunga na mutindu ti mu sumbaka Ford mosi ya ntama, mpe munu . . . beto vwanda basika na yandi. Mpe na yawu, na ntangu yina, yinzo-Nzambi ya ba-Lutherien vwandaka pene-pene ve, bawu katukaka kuna na Howard Park.

¹⁰¹ Mpe na yawu bawu vwandaka . . . longi mosi, yina tumbikaka munu na dibuundu ya ba-Baptiste Missionnaire, Docteur Roy Davis. Mpangi-kento Upshaw, yawu kele yandi yina tindaka Mpangi Upshaw na munu, to yina solulaka na yandi samu na munu, Docteur Roy Davis. Na yawu yandi vwandaka longa, nkumbu ya yinzo-Nzambi ya yandi vwandaka dibuundu ya Ntete ya ba Baptiste, to ya—ya . . . mu ke kwikila ve ti yawu vwandaka dibuundu ya Ntete ya ba Baptiste, to, yawu vwandaka Mission- . . . nkumbu ya yawu vwandaka dibuundu ya ba-Baptiste Missionnaire ya na Jeffersonville. Yandi vwanda longa kuna na ntangu yina kuna, mpe beto vwanda kwenda na yinzo-Nzambi na nkokila, na yawu . . . na manima beto vwanda yutuka. Mu kumaka ata fioti ve mundimi ya dibuundu yina, kasi mu vwandaka kaka kusepela kukwenda kuna kintwadi na yandi. Mpamba ve dibanza yayi me luta mfunu kuvwandaka “kubasika na yandi,” ya ke mbote ti mu vwanda ya kusungama.

¹⁰² Na yawu mu vwanda basika na yandi, mpe kilumbu mosi munu . . . Yandi butukaka na dibuta mosi ya mbote. Mpe mu bandaka na kubanza, “Benozaba, benozaba, mu zolaka ve kulutisa ntangu ya mwana-kento yina. Ya kele—ya kele mbote ve, samu yandi ke mwana-kento mosi ya mbote, mpe munu kele mputu mpe—mpe munu . . .” Papa ya munu kumaka kubela, mpe munu—munu . . . Mu vwandaka ve na makuki ya kudisa mwana-kento ya mutindu yina, yina mesanaka na yinzo ya kitoko na batapi na nsi.

¹⁰³ Mu ke bambuka tapi ya ntete yina mu monaka, mu ke zabaka ve kana yinki kima yawu vwandaka. Mu lutaka pene-pene ya yawu. Mu banzaka ti yawu vwandaka kima yayi me luta kitoko na yina mu me monaka na luzingu ya munu. “Samu na yinki bawu me tanda kima ya mutindu yayi na ntoto?” Yawu vwandaka tapi ya ntete yina mu monaka. Yawu vwandaka—yawu vwandaka mosi ya ba . . . Mu banza ba ke bokilaka yawu “batapi ya kutunga.” Mu lenda sala kifu. Ya me fwanana fioti na “kekele” to kima mosi yina bansinga ya yawu me tungama mutindu etoko, mpe bawu tandaka yawu na ntoto. Yawu vwandaka na ntinta ya kitoko ya vert mpe ya mbwaki, mpe na kati-kati ya yawu bawu yemaka felele rose, benozaba. Yawu vwandaka kima mosi ya kitoko.

¹⁰⁴ Mpe na yawu mu ke bambuka moyo ti mu—mu bakaka mukanu ti kana mu lendaka kukwela yandi, to mu kwenda ntama ya yandi samu bakala mosi ya mbote kukwela yandi, muntu yina ke vwanda mbote samu na yandi, yina lenda kudisa

yandi mpe kuvwanda mbote samu na yandi. Mu lendaka vwanda mbote samu na yandi, kasi mu—mu—mu vwandaka baka kaka cent makumi zole na ngunga mosi. Na yawu mu lendaka kudisa yandi ve. Mpe mu. . . Na dibuta ya muvimba yina mu lendaka baka kizitu ya yawu, mpe mutindu Papa bandaka na kubela, ya lombaka ti mu baka kizitu ya bawu nionso, na yawu mu vwanda lutisa ntangu mosi ya mpasi.

¹⁰⁵ Na yawu mu banzaka, “Mbote, kima mosi yina mu lendaka sala kele kutuba na yandi ti mu—mu. . . yandi. . . mu—mu ke kwisa diaka ve, samu mu ke na kupesa yandi kizitu mingi mpe mu mangaka kubebisa luzingu ya yandi mpe kubika yandi lutisa ntangu ya yandi mpamba kintwadi na munu.” Mpe diaka mu banzaka, “Kana muntu mosi lenda kutana na yandi mpe kukwela yandi, kusala na yandi dibuta ya kitoko. Mpe mbala yankaka kana mu lendaka kwela yandi ve, mu meka—mu meka kuzaba kana yandi kele na kiesee.”

¹⁰⁶ Na yawu mu banzaka, “Kasi mu—mu lenda kaka—mu lenda kaka kubika yandi ve!” Mu—mu vwandaka diaka munu ve. Mpe konso kilumbu mu vwandaka banza diambu yango. Na yawu mu vwandaka na nsoni mingi na kuyufula yandi dikwela. Nkokila nionso mu vwanda baka mukanu, “Mu ke yufula yandi.” Mpe, na ntangu munu, ee, yinki ba ke bokilaka yawu, bipeki-peki, to kima mosi yina me salamaka na. . . ? Beno nionso bampangi yayi kele awa kieleka beno me zingaka ntete diambu yango na ntangu mosi kuna. Mpe mu kukiwaka mutindu yankaka, kizizi ya munu kumaka tiya. Mu—mu zabaka ve. Mu vwanda kuka ve kuyufula yandi.

¹⁰⁷ Na yawu mu banza ti beno ke kukiyufula yinki mutindu mu kwelaka. Beno zaba? Mu sonikilaka yandi mukanda samu na kuyufula yandi. Mpe na yawu yandi. . . Ntangu yayi, yawu vwandaka ve “Mademoiselle,” yawu vwandaka mwa fioti kulutula yawu (beno zaba) na ndambu ya zola. Yawu vwandaka mukanda mosi ya ngwisani kaka ve, yawu vwandaka. . . Mu—mu sonikaka yawu mbote mpenza, na mutindu mu lendaka sonika yawu.

¹⁰⁸ Mpe mu vwandaka banga mama ya yandi mwa fioti. Mama ya yandi vwandaka. . . ya vwandaka na mwa mambu ngolo. Mpe, kasi tata ya yandi vwandaka Hollandais mosi ya kikesa mpe ya mawete, muntu mosi ya mbote mingi. Yandi vwandaka ntwadisi ya kimvuka ya misadi, ya basadi, ya nzila ya train, bawu vwandaka futa yandi pene ya bankama tanu ya ba-dollars na ntangu yina. Na yawu munu yayi vwandaka baka ba cent makumi zole na ngunga mosi, munu kwela mwana ya yandi. Hum! Mu zabaka ti yawu lendaka simba ve. Na mama ya yandi yina vwandaka kaka. . . Kasi, yandi kele kento ya mbote. Mpe yandi—yandi vwandaka mutindu ya bantu ya nene, beno zaba, mpe na mutindu ya mwa bipadi, beno zaba, mpe na yawu yandi vwandaka mpenza ve na nsatu ya munu ata yinki

mutindu. Mu vwandaka kaka mwana-bakala mosi ya ntwenia ya mpamba-mpamba yina me katukaka na mfinda, mpe mu vwandaka banza ti Hope lendaka basika na mwana-bakala mosi ya mwa lukumu mingi, mpe munu—munu—munu banza ti yandi vwandaka na lunungu. Na yawu . . . Kasi munu—munu vwandaka banza mutindu yina ve na ntangu yina.

¹⁰⁹ Na yawu mu banzaka, “Yinga, ntangu yayi, mu zaba ve yinki mutindu. Munu—munu lenda yufula papa ya yandi ve, mpe munu—munu zaba kieleka ti mu ke yufula mama ya yandi ve. Na yawu mu lenda yufula yandi mosi ntete.” Na yawu mu sonikaka mukanda ya munu. Mpe na suka yina na nzila ya kisalu, mu tulaka yawu na bwati ya mikanda. Mikanda . . . Beto zolaka kwenda na yinzo-Nzambi na Kilumbu ya tatu na nkokila, mpe yawu vwandaka na Kilumbu ya ntete na suka. Kilumbu ya muvimba na Lumingu mu vwandaka meka na kutuba na yandi ti mu zola kwela, kasi mu vwandaka mpenza na kikesa yina me lunga ve.

¹¹⁰ Na yawu mu tulaka yawu na bwati ya mikanda. Mpe kilumbu yina na kisalu dibanza mosi kwisaka na munu, “Na yawu kana mukanda yango kubwa na maboko ya mama ya yandi?” Oh, la la! Na yina mu zabaka ti mu me beba kimakulu kana—kana kaka yawu me bwa na maboko ya yandi, samu yandi vwandaka kipe munu ve. Ee, mu vwandaka na kati ya mpasi.

¹¹¹ Mpe Kilumbu yina ya tatu na nkokila na ntangu mu kumaka, oh, la la, mu banzaka, “Mu ke kwenda kuna yinki mutindu? Kana mukanda yango kubwaka na maboko ya mama ya yandi, ya ke katula munu mpusu, na yawu mu ke na kivuvu ti mwana muntu bakaka yawu.” Mu tindilaka yawu “Hope.” Yawu yina vwandaka nkumbu ya yandi, Hope. Na yawu mu banzaka, “Mu ke sonika yawu kaka na Hope.” Na yawu . . . Mu banzaka ti mbala yankaka yawu lunga salama ti yandi bakaka yawu ve.

¹¹² Na yawu mu bakaka dibanza ya mbote ya kutelama na nganda mpe kubula lusipu samu yandi basika. Oh, la la! Mpe mwana-bakala nionso ya ntwenia yina ke na kikesa yina me lunga ve ya kupusana tii na yinzo mpe kubula na kielo samu na kuyufula mwana-kento, yandi ke na nsatu ya kubasika na yandi ata fioti ve. Yina ke kaka ya kieleka. Yina ke mpenza buzoba. Yina ke na mfunu ve.

¹¹³ Na yawu mu telemisaka Ford ya munu ya ntama, beno zaba, mpe mu ngengisaka yawu mpenza. Na yawu mu pusanaka mpe mu bulaka na kielo. Ayi, mama ya yandi kwisaka zibula kielo! Pema manaka munu, mu tubaka, “Mbote—mbote—mbote na nge, Mama Brumbach?” Yinga.

¹¹⁴ Yandi tubaka, “Mbote na nge, William.”

Mu banzaka, “Uh-oh, ‘William’!

Mpe—mpe yandi tubaka, “Nge zola kota?”

115 Mu tubaka, “Matondo na nge.” Mu kotaka na yinzo. Mu tubaka, “Hope me finama na kukubama?”

116 Mpe na ntangu yina Hope yandi yina ke kwisa na kudumuka-dumuka na kati ya yinzo, yandi vwandaka mwana-kento ya ntwenia ya bamvula pene ya kumi na sambanu. Mpe yandi tubaka, “Mbote, Billy!”

117 Mpe mu tubaka, “Mbote, Hope.” Mpe mu tubaka, “Nge zola manisa na kukubama samu mu ke kwenda na yinzo-Nzambi?”

Yandi tubaka, “Na bamuniti fioti.”

118 Mu banzaka, “Oh, la la! Yandi me baka yawu ve. Yandi me baka yawu ve. Mbote, mbote, mbote. Hope mpe me baka yawu ve, na yawu diambu ke vwanda ve, samu ti yandi zolaka tuba na munu.” Na yawu mu waka mwa mbote.

119 Na manima na ntangu mu kumaka na yinzo-Nzambi, dibanza mosi kwisaka na munu, “Na yawu kana yandi bakaka yawu mpenza?” Beno me mona? Mu vwanda wa ve mambu yina Docteur Davis vwandaka tuba. Mu losaka meso na lweka ya yandi, mpe mu banzaka, “Kana mbala yankaka yandi ke na kuingila, samu na ntangu mu ke basika yandi katula munu mpusu, na mutindu mu yufulaka yandi diambu yina.” Mpe mu vwanda wa ve mambu yina Mpangi Davis vwanda tuba na munu. Mpe—mpe mu losaka meso na lweka ya yandi, mpe mu banzaka, “Oh, la la, mu lenda kanga ntima ve na kubika yandi, kasi. . . Mpe munu—munu. . . ya ke lomba kukuma na nsuka ya diambu yango.”

120 Na yawu ntangu bisambu manaka beto tambulaka kintwadi, samu na kuvutuka na yinzo, mpe—mpe na yawu beto tambulaka tii na kisika Ford ya ntama kuvwandaka. Na ntangu beto vwanda tambula ngonda vwandaka ngenga, beno zaba, mu talaka yandi mpe yandi vwandaka kitoko. Oh, la la, mu vwanda tala yandi, mpe mu banzaka, “Oh, la la, mu zola kwela yandi mpenza, kasi mu banza ti mu lenda ve.”

121 Na yawu mu fulaka na kutambula fioti, beno zaba, mpe mu talaka yandi diaka. Mu tubaka, “Yinki—yinki mutindu nge ke wa na nkokila yayi?”

Yandi tubaka, “Oh, mu kele mbote.”

122 Beto telemisaka Ford ya ntama mpe beto kitaka, beno zaba, pene-pene ya nzila, beto balukaka na nsongi mpe beto tambulaka tii na yinzo. Mpe mu kwendaka tii na kielo kintwadi na yandi. Mu banzaka, “Nge zaba, mbala yankaka yandi bakaka mukanda yango ve, na yawu ya ke vwanda mbote mu zimbana yawu. Na yawu mu ke kuzwa sabala yankaka ya ngemba.” Na yawu mu bandaka na kuwa mwa mbote.

Yandi tubaka, “Billy?”

Mu tubaka, “Yinga.”

Yandi tubaka, “Mu bakaka mukanda ya nge.” Oh, la la!

Mu tubaka, “Nge bakaka yawu?”

¹²³ Yandi tubaka, “Uh-huh.” Mbote, yandi fulaka kaka na kutambula, yandi tubaka ata ndinga mosi diaka ve.

¹²⁴ Mu banzaka, “Kento, tuba na munu kima mosi. Kula munu to tuba na munu yina nge ke banza samu na yawu.” Mu tubaka, “Nge—nge tangaka yawu?”

Yandi tubaka, “Uh-huh.”

¹²⁵ Oh, la la, beno zaba mutindu kento lenda bika beno na ngitukulu. Oh, mu—mu zolaka tuba yawu mutindu yina ve, beno me mona. Beno me mona? Kasi, na mutindu nionso, beno zaba, mu—mu banzaka, “Samu na yinki nge ke tuba kima ve?” Beno me mona, mpe mu landaka na kutambula. Mu tubaka, “Nge tangaka yawu nionso?”

Mpe yandi . . . [Kitini ya mpamba na bande—Mu.] “Uh-huh.”

¹²⁶ Na yawu beto kumaka pene-pene ya kielo, mpe mu banzaka, “Oh, la la, kunata munu ve tii na velanda, samu mbala yankaka mu ke luta bawu na nswalu nionso, na yawu tuba na munu ntangu yayi.” Mpe na yawu mu landilaka kaka na kuingila.

¹²⁷ Yandi tubaka, “Billy, mu ke sepela mingi kusala yawu.” Yandi tubaka, “Mu zola nge.” Nzambi kusakumuna moyo ya yandi ntangu yayi, yandi ke na nkembo. Yandi tubaka, “Mu zola nge.” Yandi tubaka, “Mu banza ti beto lenda tuba yawu na kibuti ya beto . . . kibuti ya beto samu na yawu. Nge ke banza mutindu yina ve?”

¹²⁸ Mpe mu tubaka, “Cherie, wa, beto banda ntete na kukabula diambu yango na kati-kati.” Mu tubaka, “Mu ke tuba na papa ya nge kana nge tuba na mama ya nge.” Mu bikilaka yandi kitini ya kulutila yimbi, na kubanda.

Yandi tubaka, “Mu me ndima, kana nge ke banda ntete kutuba na Papa.”

Mu tubaka, “Mu me ndima, mu ke tuba na yandi na Lumingu na nkokila.”

¹²⁹ Mpe beto kumaka na Lumingu na nkokila, mu kwendaka vutula yandi na yinzo kubanda na yinzo-Nzambi mpe munu . . . Yandi vwandaka kaka kutala munu. Mpe mu talaka, yawu vwandaka na ngunga yivwa na ndambu, yawu vwandaka ngunga ya munu ya kukwenda. Na yawu Charlie vwandaka na bureau ya yandi, yandi vwandaka bula masini kukondwa kupema. Mpe Mama Brumbach vwandaka na nsongi, ya vwanda sala mutindu ya mitunga, beno zaba, to mwa ba-cerceaux yina ba ke tulaka na zulu ya bima, beno zaba. Mu zaba ve mutindu ba ke bokilaka yawu. Na yawu yandi vwanda sala kisalu ya mutindu yina. Na yawu Hope vwandaka tala munu kaka, mpe yandi vwandaka tala munu na meso ya mawa, beno zaba, na kutalisa munu papa

ya yandi. Mpe munu . . . Oh, la la! Mu banzaka, “Yinki mutindu ya ke vwanda kana yandi tuba, “Ve?” Na yawu mu bandaka na kukwenda na kielo, mu tubaka, “Mbote, mu me mona ti ya ke vwanda mbote ti mu kwenda.”

¹³⁰ Mpe mu vwanda kwenda na kielo, mpe—mpe yandi kwisaka na kielo kintwadi na munu. Yandi vwanda kwisa bika munu na kielo ntangu nionso samu na kutuba na munu “mpimpa ya mbote.” Na yawu mu bandaka na kukwenda na kielo, mpe yandi tubaka, “Nge ke tuba na yandi ve?”

¹³¹ Mu tubaka, “Hum!” Mu tubaka, “Mu ke na kumeka kaka, kasi mu—mu—mu ke mona ve mutindu ya kusala yawu.”

¹³² Yandi tubaka, “Mu me vutuka mpe nge bokila yandi na nganda.” Na yawu yandi vutukaka mpe yandi bikaka munu kuna.

Mpe mu tubaka, “Charlie.”

Yandi balukaka mpe yandi tubaka, “Yinga, Bill?”

Mu tubaka, “Mu lenda solula na nge mwa minuti fioti?”

¹³³ Yandi tubaka, “Kima ve.” Yandi balukaka mpe talaka munu tuka kuna na bureau ya yandi. Mama Brumbach talaka yandi, yandi talaka Hope, mpe yandi talaka munu.

Mu tubaka, “Nge lenda kwisa na velanda?”

Mpe yandi tubaka, “Yinga, mu ke na kukwisa.” Na yawu yandi kwisaka na nganda na velanda.

Mpe mu tubaka, “Ya kieleka yayi ke nkokila mosi ya kitoko, mutindu yina ve?”

Mpe yandi tubaka, “Yinga, yawu ke mutindu yina.”

Mu tubaka, “Mulunge vwandaka mpenza.”

“Ya kieleka mpenza,” yandi talaka munu.

¹³⁴ Mu tubaka, “Mu ke na kusalaka mpenza ksalu mosi ya ngolo,” mu tubaka, “nge zaba, ata mpe maboko ya munu me kuma ngolo.”

Yandi tubaka, “Nge lenda baka yandi, Bill.” Oh, la la! “Nge lenda baka yandi.”

¹³⁵ Mu banzaka, “Oh, yina ke mbote mingi.” Mu tubaka, “Nge ke tuba ya kieleka, Charlie?” Yandi tubaka . . . Mu tubaka, “Charlie, tala, mu zaba ti yandi kele mwana ya nge ya kento, mpe nge ke na mbongo.”

¹³⁶ Yandi tandaka diboko mpe yandi simbaka munu na diboko. Yandi tubaka, “Bill, wa, na luzingu ya muntu mbongo ke salaka nionso ve.” Yandi tubaka . . .

¹³⁷ Mu tubaka, “Charlie, mu—mu ke bakaka kaka ba-cent makumi zole na ngunga mosi, kasi mu zola yandi mpe yandi zola munu. Mpe mu ke sila na nge, Charlie, ti mu ke salaka ksalu ya ngolo na mutindu ti . . . maboko ya munu ke kuma ngolo mingi,

samu na kukipe yandi. Mu ke vwanda ya kukwikama na yandi na mutindu nionso.”

¹³⁸ Yandi tubaka, “Mu me ndima yawu, Bill.” Yandi tubaka, “Wa, Bill, mu zola tuba na nge.” Yandi tubaka, “Nge zaba, kiese, ya ke lomba kaka mbongo ve samu na kuvwanda na kiese.” Yandi tubaka, “Vwanda kaka mbote na yandi. Mpe mu zaba ti nge ke vwanda na yandi mbote.”

Mu tubaka, “Matondo na nge, Charlie. Ya kieleka mu ke sadila yawu.”

¹³⁹ Na manima yawu kumaka ntangu ya yandi ya kuzabisa Mama ya yandi. Mu zaba ve yinki mutindu yandi salaka yawu, kasi beto kwelanaka.

¹⁴⁰ Na yawu, ntangu beto kwelanaka, beto vwandaka na kima mosi ve, kima mosi ve samu na kubanda kuzinga kintwadi. Mu banza ti beto vwandaka na ba-dollars zole to tatu. Na yawu beto futilaka yinzo mosi, yawu vwandaka na ntalu ya ba-dollars yiya na ngonda mosi. Yawu vwandaka mwa yinzo ya fioti, ya bitini zole. Mpe muntu mosi kabilaka beto mbeto mosi ya ntama yina ba ke gumbaka. Mu ke kukiyufula kana ke na muntu mosi yina me monaka mbeto ya ntama yina ba ke gumbaka? Bawu kabilaka beto yawu. Na yawu mu kwendaka na magazini Sears mpe Roebucks samu na kusumba mesa mosi ya fioti na bakiti yiya, mpe yawu—yawu vwandaka ve na mukubu, beno zaba, mpe beto bakaka yawu na mfuka. Na manima mu kwendaka na Tata Weber, muteki ya bima ya ntama, mpe mu sumbaka dituka. Mu sumbaka yawu na ba-cent makumi sambwadi na tanu, mpe mu futaka dollar mosi na mwa ndambu samu na mitalaka ya yawu. Beto bandaka kuzinga kintwadi. Mu yemaka felele ya trêfle na zulu ya bakiti, na ntangu mu pakulaka yawu mukubu. Mpe, oh, beto vwandaka na kiese, ata mpe mutindu yina. Beto vwandaka mosi samu na yankaka, mpamba ve yawu yina vwandaka na mfunu samu na beto. Mpe Nzambi, na mawa ya Yandi mpe mambote ya Yandi, beto vwandaka mwa bankwelani yina vwandaka na kiese mingi na zulu ya ntoto.

¹⁴¹ Mu monaka mutindu yayi, ti kiese ke katukaka ve na mingi ya bima ya yinza yayi beno kele na yawu, kasi na mutindu beno ke sepela na ndambu yina me pesama na beno.

¹⁴² Mpe, mwa ntangu fioti na manima, Nzambi kulumukaka mpe sakumunaka mwa yinzo ya beto, beto butaka mwana ya bakala. Nkumbu ya yandi vwandaka Billy Paul, yandi kele awa na lukutakanu na ntangu yayi. Mpe mwa ntangu fioti na manima ya yawu, pene-pene ya bangonda kumi na mosi, Yandi sakumunaka beto diaka na mwana-kento na nkumbu ya Sharon Rose, yayi me katuka na mpova ya “Rose ya Sharon.”

¹⁴³ Mpe mu ke bambuka moyo ti kilumbu mosi mu bumbaka mbongo samu na kukwenda na konzé, kukwenda na kisika mosi, na Dyanga Paw Paw, samu na kuloba. Mpe na kuvutuka . . .

¹⁴⁴ Mpe na ntangu yina . . . Mu ke na kuzimbana lupindulu ya ntima ya munu. Mu pindulaka ntima. Mpe Docteur Roy Davis tumbikaka munu, na Dibuuundu ya ba-Baptiste Missionnaire, mpe na manima mu kumaka longi mpe bakaka tabernacle ya munu mosi kisika mu ke longakaka ntangu yayi na Jeffersonville. Mpe mu vwandaka pasteur na mwa yinzo-Nzambi yango. Mpe munu . . .

¹⁴⁵ Kukondwa kubaka mbongo, mu vwandaka pasteur ya yinzo-Nzambi yina bamvula kumi na nsambwadi mpe mu bakaka ata mpata mosi ve. Mu vwandaka ndima ve na ku- . . . Ata kitunga ya makabu kuvwandaka ve na yinzo-Nzambi. Mpe samu na ba-dime yina mu vwanda baka samu na kisalu ya munu, mpe nionso yina, beto vwandaka na sanduku mosi ya fioti kuna na nsuka ya yinzo, sika wapi ba sonikaka, na zulu ya dibaya, “Na bambala nionso beno salaka yawu na yina me luta fioti kati ya bayina ya Munu, beno salaka yawu na Munu.” Na yawu na mutindu yina beto sumbaka lupangu ya yinzo-Nzambi. Beto bakaka mfuka ya kufuta na bamvula kumi, kasi beto futaka yawu bamvula zole lungaka ve. Mpe mu bakaka ata mbala mosi ve dikabu na mutindu yina.

¹⁴⁶ Na yawu mu vwandaka, oh, na mwa ndambu ya ba-dollars mu bumbaka samu kukwenda na konzé. Yandi vwandaka sala, mpe, na Izini ya Basimisi Fine. Mwana-kento mosi ya kitoko ya zola. Mpe mbala yankaka ntoni ya yandi me fikama na mvula ya mpembe bubu yayi, kasi yandi kele kaka na kati ya ntima ya munu. Mpe mu ke bambuka moyo na ntangu yandi salaka kisalu ya ngolo samu na kusadisa munu ti munu kuzwa mbongo yina me lunga samu na kukwenda kuloba na dyanga yina.

¹⁴⁷ Na ntangu mu vwandaka katuka na dyanga, mu bandaka kumona, na ntangu mu vwandaka kuma na Mishawaka mpe na South Bend, na Indiana, mu bandaka na kumona batomabilu na bisono na manima ya yawu, ke tuba, “Yesu Kaka.” Mpe mu banzaka, “Yina ke wakana ya kuswaswana, ‘Yesu Kaka.’” Mu bandaka na kumona bisono yankaka. Mpe yawu sonamaka bisika nionso na bavelo, ba-Ford, ba-Cadillac, mpe nionso yina, “Yesu Kaka.” Mu landaka batomabilu yankaka, mpe bawu kumaka na yinzo-Nzambi mosi ya nene. Mpe mu monaka ti bawu vwandaka ba-Pentecotiste.

¹⁴⁸ Mu ke waka nsangu ya ba-Pentecotiste, kasi bawu vwandaka nkonga ya “ba-exalté yina vwandaka kotandama na nsi mpe kutangisa mate,” mpe mambu nionso yayi ba ke tubaka na munu. Na yawu mu vwandaka na mfunu ya bawu ata fioti ve.

¹⁴⁹ Na yawu mu vwandaka kuwa bawu nionso kunatama kuna na kati, mpe mu banzaka, “Mu banza ti mu ke kota kaka.” Na yawu mu telemisaka Ford ya munu ya ntama mpe mu kotaka, mpe mikunga ya mutindu yina beno me waka ntete ve na luzingu ya beno! Mpe mu bakulaka ti yawu vwandaka mabuundu zole

ya nene, mosi ya yawu vwandaka na nkumbu ya P.A. ya J.C., mpe P.A. ya W., mingi kati ya beno lenda bambuka ba organi-yina ya ntama . . . Mu banza ti bawu me vukana, ba me bokilama ntangu yayi, mpe ba me bokilama dibuundu ya ba-Pentecotiste yina me Vukana. Mbote, mu waka milongi ya bawu yankaka. Bawu vwandaka kuna, oh, bawu vwandaka longi na yina me tadila Yesu mpe mutindu Yandi kele nene, mpe yinki mutindu nionso vwandaka na nkembo, mpe samu na “mbotika ya Mpeve-Santu.” Mu banzaka, “Yinki bawu ke na kuzonzila?”

¹⁵⁰ Mpe, na manima mwa ntangu fioti, muntu mosi telemaka mbala mosi mpe yandi bandaka kutuba na bandinga ya malumu. Mbote, mbala ntete munu kuwa mambu ya mutindu yina na luzingu ya munu. Mpe diaka tala mwana-kento mosi ke kwisa na mbangu ya yandi nionso katuka kuna. Na manima bawu nionso telemaka mpe bawu bandaka na kubaka mbangu. Mpe mu banzaka, “Mbote, mpangi-bakala, ya kieleka ti bawu zaba ve kukitwadisa na yinzo-Nzambi!” Bawu vwandaka boka mpe kuboka ngolo mpe kunatama, mu banzaka, “Yinki nkonga yayi!” Kasi, beno zaba, diambu mosi samu na yawu vwandaka ti, na mutindu mu vwandaka wumela kuna, mu kumaka kusepela na yawu mingi. Kima mosi vwandaka kuna yina monanaka ya mbote mingi. Mu bandaka na kutala bawu mbote-mbote. Mpe yawu vwandaka landa kaka. Mu banzaka, “Mu ke kangila bawu ntima na mwa ntangu fioti, mpamba ve ti na . . . Mu ke pene-pene ya kielo. Kana bawu me banda na kulutisa ndilu, mu ke basika na mbangu nionso. Mu zaba kisika tomabilu ya munu kele, kaka awa na nsongi.”

¹⁵¹ Mu bandaka na kuwa balongi ya bawu yankaka, bawu vwandaka bantu ya mayele mingi mpe yina me longukaka mingi. Mbote, mu banzaka, “Yawu kele mbote mingi.”

Na yawu ngunga ya madia ya nkokila kulungaka, bawu tubaka, “Muntu nionso kwisa kudia.”

¹⁵² Kasi mu banzaka, “Vingila mwa fioti. Mu kele na na dollar mosi mpe ba-cent makumi sambwadi na tanu samu na kuvutuka na yinzo, mpe munu . . .” Mbongo nionso yawu yina mu vwandaka na yawu samu na essence. Yawu yina kaka ke sala ti mu vutuka na yinzo. Mu vwandaka na Ford ya munu ya ntama, yawu vwandaka Ford mosi ya mwa mbote. Yawu vwandaka kimbambala ve, yawu vwandaka kaka mutindu mosi na yina mu ke na yawu awa, yawu vwandaka kaka ya kulemba. Mpe yawu . . . Mu vwandaka ndima ve ti yawu vwandaka tambula na ba kilometres makumi tanu na ngunga mosi, kasi na ntembe ve ti yawu kele kumi na tanu na kukwenda mutindu *yayi* mpe kumi na tanu na kuvutuka mutindu *yayi*. Beno me mona, kana beno vukisa yawu, yawu me pesa makumi tatu. Mpe na yina yawu . . . Mu banzaka, “Mbote, na nkokila yina mu banza ti mu zolaka vutuka mpe na manima ya . . .” Mu bikalaka samu na lukutakanu ya nkokila.

¹⁵³ Mpe, oh, yandi tubaka, “Balongi nionso, ya konso denomination yina, bawu kwisa na kisika ya malongi.” Mbote, beto vwandaka pene ya bankama zole na kisika ya malongi, mu mataka mpe kuna. Na yawu yandi tubaka, “Ntangu yayi, beto kele na ntangu mingi ve samu ti beno nionso kulonga.” Yandi tubaka, “Beni luta kaka mosi na mosi mpe beno pesa nkumbu mpe kisika beno me katuka.”

¹⁵⁴ Mbote, yawu kumaka ntangu ya munu, mu tubaka, “William Branham, Baptiste. Jeffersonville, Indiana.” Mu lutaka.

¹⁵⁵ Mu vwandaka kuwa bayayi yankaka nionso kukibokila, “Pentecotiste, Pentecotiste, Pentecotiste, P.A. ya W., P.A.J.C., P.A.W., P. . .”

¹⁵⁶ Mu lutaka. Mu banzaka, “Mbote, munu kaka kele mutindu yankaka awa.” Na yawu mu vwandaka, mu vingilaka.

¹⁵⁷ Mpe, kilumbu yina, bawu tulaka balongi ya mbote, bantwenia, mpe bawu longaka na ngolo nionso. Na manima bawu tubaka, “Yina ke longi na nkokila ya bubu yayi kele. . .” Mu banza ti bawu bokilaka yandi, “Mbuta.” Mpe balongi ya bawu, na kisika ya “Révérend,” yawu vwandaka “Mbuta.” Na yawu bawu bokilaka kiboba mosi ya ndombe na kisika ya malongi, mpe yandi lwataka kazaka mosi ya balongi ya mutindu ya ntama. Mu ke ndima ti beno me monaka yawu dezia. Yawu vwandaka na mukila ya yinda na mukongo mutindu ya ndeke, beno zaba, mpe nkingu ya yawu ya velours, mpe yandi vwandaka na mwa bansuki ya mpembe na yintu ya yandi. Kiboba ya bantu, yandi basikaka mutindu *yayi*, beno zaba. Yandi telemaka kuna mpe yandi balukaka. Mpe kuna na ntangu balongi nionso longaka na yina me tadila Yesu mpe munene. . . mutindu Yandi kele nene, mpe nionso yina, kiboba yina bakaka dilongi ya yandi kuna na Job. “Wapi nge vwandaka na ntangu mu vwandisaka yinza, to na ntangu bambwetete ya suka yimbilaka kintwadi mpe bana ya Nzambi bokaka na kiese?”

¹⁵⁸ Mpe kiboba ya bantu, mu banzaka, “Samu na yinki bawu me tula ve mosi ya bantwenia yina kulonga?” Munene. . . kisika yango vwandaka ya kifuluka na bantu. Mu banzaka, “Samu na yinki bawu me sala mutindu yina ve?”

¹⁵⁹ Na yawu kiboba yayi, na kisika yandi longi mambu yayi ke na kusalama awa na zulu ya ntoto, yandi bandaka na kulonga ntangu nionso mambu yina vwandaka salama na Zulu. Mbote, yandi nataka Yandi na mbatukulu—na mbatukulu ya ntangu, mpe yandi vutulaka Yandi na Kwizulu ya Zole na kulandaka nkongolo kilala. Mbote, mu me waka ntete ve dilongi ya mutindu yayi na luzingu ya munu! Kaka na mwa ntangu yina Mpeve kulumukilaka yandi, yandi dumukaka pene-pene ya zulu mutindu *yayi* mpe yandi bulaka makulu ya yandi kintwadi, yandi vutulaka mapeka ya yandi na manima mutindu yayi mpe yandi katukaka na kudumuka-dumuka na kisika ya malongi,

yandi tubaka, “Beno kele ve na kisika ya malongi ya nene samu na munu.” Kasi yandi vwandaka na kisika ya nene kulutila yayi mu kele na yawu awa.

¹⁶⁰ Mu banzaka, “Kana Yina salaka ti kiboba kusala mambu ya mutindu yayi, yinki Yawu ke sala kana Yawu kwisa na zulu ya munu?” Mu—mu banzaka, “Mbala yankaka mu ke vwanda na nsatu ya Yawu fioti.” Mbote, ntangu yandi mataka na kisika ya malongi, mu waka mingi kiboba yango. Kasi, ntangu yandi katukaka, mu kukiwaka mawa. Mu talaka yandi na ntangu yandi vwandaka kukita tuka na kisika ya malongi.

¹⁶¹ Mu kwendaka na nkokila yina, mpe mu banzaka, “Mbote, mbasi na suka mu ke tuba na muntu mosi ve kisika mu me katuka, mpe nani munu kele.” Na yawu mu kwendaka, mpe na mpimpa yina mu gomaka pantalon ya munu. Mu bakaka . . . mu kwendaka kulala na kilanga ya masangu, mpe mu kwendaka sumba mwa mampa ya mazono. Beno . . . Mu sumbaka dibuki ya yawu ya muvimba na ba-cent tanu. Pompe ya kufwila tiya vwandaka kuna, mu bakaka masa. Na yawu mu zabaka ti mu ke wumela na yawu mwa fioti, mu bakaka masa mpe munu nwaka yawu, na manima mu kwendaka mpe mu diaka mampa ya munu. Mu vutukaka diaka mpe nwaka diaka masa. Mu kwendaka na kilanga ya masangu, mu vukisaka bakiti zole mpe mu tulaka mwa pantalon ya munu ya kilo ya kare-kare na kati-kati, mu gomaka yawu na kiti.

¹⁶² Mpe, na mpimpa yina, mu sambilaka pene-pene ya mpimpa ya muvimba. Mu tubaka, “Mfumu, mu me kota na kati ya yinki yayi? Mu me monaka ntete ve bantu ya nsambulu ya mutindu yayi na luzingu ya munu.” Mpe mu tubaka, “Sadisa munu na kuzaba yina me tadila mambu ya mutindu yayi nionso.”

¹⁶³ Mpe mu kwendaka kuna na suka yina landaka. Bawu bokilaka beto samu na kudia madia ya suka. Ya kieleka, mu mangaka kukwenda kudia kintwadi na bawu, samu mu vwandaka na kima ve samu na makabu. Na yawu mu vutukaka. Na suka yina landaka ntangu mu kumaka, mbote (mu katukaka na kudia mwa mampa ya munu), mu vwandaka. Na yawu bawu tulaka micro. Kasi mu me monaka ntete ve micro, mpe mu vwandaka banga kima yango. Na yawu bawu . . . Mpe yawu vwandaka na mwa nsinga yina mosi ya kukangama awa na zulu, mpe yawu vwandaka tala na nsi. Mosi ya yawu me simbama na zulu, mutindu yayi. Mpe yandi tubaka, “Mazono na nkokila, longi mosi ya ntwenia ya Baptiste, vwandaka awa, na kisika ya malongi.”

Mu banzaka, “Uh-oh, ba ke katula munu mpusu ntangu yayi.”

¹⁶⁴ Mpe yandi tubaka, “Yandi vwandaka leki kati ya balongi yayi vwandaka na kisika ya malongi. Nkumbu ya yandi

vwandaka Branham. Muntu mosi kuzaba kisika yandi kele? Beno tuba na yandi na kukwisa, beto zola ti yandi longa na suka yayi.”

¹⁶⁵ Oh, la la! Mu lwataka mwa polo, mpe pantalon ya kilo ya kare-kare, beno zaba. Mpe beto ba-Baptiste ke kwikilaka ti ya ke lomba kulwata kazaka, samu na kumata na chaire, beno zaba. Na yawu... Mpe mu—mu vwandaka swi. Mpe na ntangu yina... Bawu salaka yawu kuna na Nord na ntangu yina samu (lukutakanu ya bawu ya yinza ya muvimba) bantu-ndombe lendaka kwisa ve kana yawu salamaka na Sud. Bawu vukanaka na bantu-ndombe kuna, mpe mu vwandaka muntu ya Sud, mu vwandaka diaka na lulendo, beno me mona, mu vwandaka kukimona mbote mingi kulutila bayankaka. Mpe yawu salamaka na suka yina ti, yina vwandaka pene-pene ya munu vwandaka muntu ndombe. Na yawu mu vwandaka mpe mu tombulaka meso ya munu na yandi. Mu banzaka, “Mbote, yandi kele mpangi-bakala.”

¹⁶⁶ Mpe yandi tubaka, “Muntu mosi kuzaba kisika William Branham kele?” Mu kukizindisaka na kati ya kiti ya munu mutindu yayi. Na yawu yandi tubaka, yandi zabisaka yawu mbala zole, yandi tubaka, “Muntu mosi kuna na nganda” (yandi bendaka mwa micro yango pene-pene) “kuzaba kisika William Branham kele? Beno tuba na yandi ti beto zola yandi kwisa na kisika ya malongi samu na nsangu ya suka ntangu yayi. Yandi kele longi ya Baptiste yina me katuka na sud ya Indiana.”

¹⁶⁷ Mu vwandaka swi mpe kulumukaka mwa fioti, beno zaba. Muntu mosi ve zabaka munu, na mutindu nionso. Mpangi yina ya ndombe talaka munu, yandi tubaka, “Nge zaba kisika yandi kele?”

¹⁶⁸ Mu banzaka. Mu—mu zolaka tuba luvunu to kusala kima mosi. Na yawu mu tubaka, “Kulumuka mwa fioti awa.”

Yandi tubaka, “Yinga, tata?”

Mu tubaka, “Mu zola tuba na nge kima mosi.” Mu tubaka, “Munu—munu yandi yayi.”

Yandi tubaka, “Mbote, mata kuna.”

¹⁶⁹ Mu tubaka, “Ve, mu lenda ve. Nge me mona,” mu tubaka, “Mu me lwata mwa pantalon ya kilo ya kare-kare yayi na mwa polo yayi.” Mu tubaka, “Mu lenda mata kuna ve.”

¹⁷⁰ Yandi tubaka, “Bantu yina ke talaka ve bilele ya muntu. Mata kuna.”

Mu tubaka, “Ve, ve.” Mu tubaka, “Ntangu yayi vwanda swi, kutuba kima mosi ve.”

¹⁷¹ Na yawu bawu kwisaka diaka na micro na manima mwa ntangu fioti, bawu tubaka, “Muntu mosi kuzaba kisika William Branham kele?”

172 Yandi tubaka, “Yandi yayi awa! Yandi yayi awa! Yandi yayi awa!” Oh, la la! Mu telemaka na mwa polo yina na nzutu, beno zaba. Mpe munu yina na . . .

173 Yandi tubaka, “Kwisa, Tata Branham, beto zola ti nge longa nsangu.” Oh, la la, na ntwala ya balongi nionso yina, hum, bantu nionso yina! Mpe mu kwendaka kuna na mutindu ya kubumbana, beno zaba. Kizizi ya munu kumaka mbwaki, mpe makutu ya munu tiya. Mu mataka na mutindu ya kubumbana, na pantalon ya kilo ya kare-kare na polo, munu longi, longi ya Baptiste yayi vwandaka kwenda na micro, yina me monaka yawu ntete ve, beno me mona.

174 Mu telemaka kuna, mu tubaka, “Mbote, mu—mu—mu zaba yawu ve.” Mu vwalanganaka, kidi-kidi ya kieleka, beno zaba. Mpe—mpe mu zibulaka awa na Luc 16, mpe mu banzaka, “Mbote, ntangu yayi. . .” Mpe mu—mu bakaka dilongi, “Mpe yandi zangulaka meso ya yandi kuna na difelo, mpe yandi dilaka.” Mpe munu zwaka. . . Na yawu mu—mu bandaka na kulonga, beno zaba, mpe na ntangu mu vwandaka longa, mpe mu bandaka kuwa mwa mbote. Mpe mu tubaka, “Mvwama vwandaka na difelo, mpe yandi dilaka.” Mwa bampova tatu yina, munu kele na malongi ya mutindu yina, “Nge Me Ndimu Yawu,” mpe “Tuba Na Ditadi,” beno me waka munu kulonga yawu. Mpe mu bakaka, “Na manima yandi dilaka.” Mu tubaka, “Kuna bana kele ve, ya kieleka mpenza na difelo. Na manima yandi dilaka.” Mpe mu tubaka, “Kuna felele kele ve. Na manima yandi dilaka. Kuna Nzambi kele ve. Na manima yandi dilaka. Kuna Klisto kele ve. Na manima yandi dilaka.” Na manima yandi dilaka. Kima mosi simbaka munu. Oh, la la! Oh, la la! Na manima, mu zaba ve diambu yina salamaka. Ntangu mabanza ya munu bandaka na kuvutuka, mu vwandaka na nganda. Bantu yina bandaka na kuboka mpe kuboka ngolo mpe kudila, munu mpe, beto lutisaka ntangu mosi ya kitoko mingi.

175 Ntangu mu basikaka na nganda bakala mosi kwisaka pene-pene ya munu yandi lwataka yimpu ya nene ya Texas, na boti ya yinda, yandi kwisaka pene-pene, yandi tubaka, “Mu kele Mbuta *Kingandi*.” Longi, yandi lwataka boti ya yinda ya ba cow-boy, na bilele ya ba cow-boy.

Mu banzaka, “Mbote, pantalon ya munu ya kilo ya kare-kare kele yimbi mingi ve.”

176 Yandi tubaka, “Mu zola ti nge kwisa na Texas samu na lukutakanu ya reveil ya munu.”

177 “Uh-huh, bika mu sonika yawu, tata.” Mpe mu sonikaka yawu mutindu yayi.

178 Tala bakala yankaka kwisaka kuna yandi lwataka mwa pantalon yayi, ya golf ya mutindu yayi, na ntangu ya ntama bawu vwandaka lwata yawu samu na kubula nsaka ya golf, beno zaba,

mwa pantalon yina ya kuvimba. Yandi tubaka, “Mu kele Mbuta *Kingandi* ya Miami. Mu zola ti. . .”

¹⁷⁹ “Oh, la la, mbala yankaka bilele kele na mfunu mingi ve.” Mu lwataka yawu, mpe mu banzaka, “Yawu kele mbote mingi.”

¹⁸⁰ Na yawu mu bakaka bima yina nionso, mpe mbala mosi mu vutukaka na yinzo. Ntangu kento ya munu monaka munu, yandi tubaka, “Samu na yinki nge ke na kiese mingi mutindu yayi, Billy?”

¹⁸¹ Mu tubaka, “Oh, mu me kutana na bantu ya mbote mingi. Oh, la la, bawu kele bantu ya mbote mingi yina nge me monaka ntete ve. Bantu yina kele na nsoni ya nsambulu ya bawu ve.” Mpe, oh, mu tubaka na yandi nionso me tadila yawu. Mpe mu tubaka, “Mpe tala ntete awa, cherie, kinkunku ya balubokilu. Bantu yina kuna!”

Yandi tubaka, “Bawu kele ba-exalté ve, mutindu yina ve?”

¹⁸² Mu tubaka, “Mu zaba ve yinki mutindu ya ba-exalté yayi bawu kele, kasi bawu kele na kima yina mu ke na nsatu ya yawu.” Beno me mona? Mu tubaka, “Yina—yina kele diambu mosi yina mu me ndimisama na yawu.” Mu tubaka, “Mu monaka kiboba mosi, ya bamvula makumi yivwa, kuvutuka diaka ntwenia.” Mu tubaka, “Mu me waka ntete ve muntu mosi kulonga mutindu yayi na luzingu ya munu. Samu, mu me monaka ntete ve longi ya Baptiste kulonga mutindu yayi.” Mu tubaka, “Bawu ke longaka tii kuna pema kumana bawu, bawu ke gumbaka mabolongo tii na nsi, na manima bawu ke telema, mpe bawu baka diaka pema. Nge lunga wa bawu tii na bala-bala ya zole yina me landa, mpe bawu ke landila kaka kulonga.” Mpe mu tubaka, “Mu—mu me waka ntete ve diambu ya mutindu yayi na luzingu ya munu.” Mpe mu tubaka, “Bawu ke tubaka na bandinga ya malu-malu, mpe muntu yankaka ke tendula yina bawu ke tuba. Mu me waka ntete ve diambu ya mutindu yayi na luzingu ya munu!” Mu tubaka, “Nge zola kwenda na munu?”

¹⁸³ Yandi tubaka, “Cherie, na ntangu mu kwelanaka na nge, mu ke bikala na nge tii kuna lufwa ke kabula beto.” Yandi tubaka, “Mu ke kwenda.” Yandi tubaka, “Ntangu yayi, beto zabisa bibuti ya beto.”

¹⁸⁴ Mpe mu tubaka, “Mbote, nge tuba na mama ya nge mpe munu ke tuba na mama ya munu.” Na yawu beto. . . Mu kwendaka zabisa Mama.

¹⁸⁵ Mama tubaka, “Mbote, diambu kele ve, Billy. Nionso yina Mfumu me bokila nge na kusala, kwenda sala yawu.”

¹⁸⁶ Na yawu Mama Brumbach bokilaka munu. Mu kwendaka. Yandi tubaka, “Yinki mambu beno ke na kutuba?”

¹⁸⁷ Mpe mu tubaka, “Oh, Mama Brumbach,” mu tubaka, “nge me monaka ntete ve bantu ya mutindu yina.”

Yandi tubaka, “Bika makelele! Bika makelele!”

Mu tubaka, “Yinga, mama.” Mu tubaka, “Lemvokila munu.”

Mpe yandi tubaka, “Nge zaba ti yina kele nkonga ya ba-exalté?”

¹⁸⁸ Mu tubaka, “Ve, mama, mu zabaka yawu ve.” Mu tubaka, “Bawu—bawu ke bantu ya mbote mingi.”

¹⁸⁹ Yandi tubaka, “Yinki dibanza yina! Nge ke banza ti nge ke nata mwana ya munu ya kento na mambu ya mutindu yina!” Yandi tubaka, “Yayi ke buzoba! Bawu kele bantu ya kukondwa mfunu yayi mabuundu yankaka me losa na nganda.” Yandi tubaka, “Ya kieleka! Nge ke nata mwana ya munu ya kento kuna mutindu yina ve.”

¹⁹⁰ Yandi tubaka, “Kasi, nge zaba, Mama Brumbach, na kati ya ntima ya munu mu ke na kuwa ti Mfumu zola ti mu tambula kintwadi na bantu yina.”

¹⁹¹ Yandi tubaka, “Vutuka na dibuundu ya nge tii kuna bawu ke kuma na makuki ya kusumbila nge kisika ya kulonga, mpe vwanda mutindu muntu yina kele na mayele.” Yandi tubaka, “Nge ke nata mwana ya munu ya kento kuna ve.”

Mu tubaka, “Yinga, mama.” Mu balukaka mpe mu basikaka na nganda.

¹⁹² Mpe Hope bandaka na kudila. Yandi basikaka, yandi tubaka, “Billy, ata ti Mama me tuba mutindu yayi, mu ke bikala kaka na nge.” Yandi sakumuka!

Mpe mu tubaka, “Oh, diambu kele ve, cherie.”

¹⁹³ Mpe mu bikaka diambu yango. Yandi zolaka ve kubika mwana ya yandi ya kento kukwenda na kati ya bantu ya mutindu yina samu “Bawu vwandaka bantu ya kukondwa mfunu.” Na yawu mu bikaka diambu yango. Yawu vwandaka kifu ya kulutula yimbi yina mu me salaka na luzingu ya munu, mosi na yina ya kulutula yimbi.

¹⁹⁴ Mwa ntangu fioti na manima, na manima ya mwa bamvula, beto butaka bana. Mpe kilumbu mosi beto vwandaka . . . Nyamba mosi ya nene kwisaka, na 1937. Nyamba ya nene kwisaka. Mpe beto . . . Na ntangu yina kisalu ya munu vwandaka ya kutambula bisika nionso mpe kusala nionso samu na kubasisa bantu yina nionso natamaka na nyamba, bayinzo vwandaka kubwa. Mpe kento ya munu bakaka kimbevo, mpe yandi belaka mpanzi ya ngolo, ya ngolo mpenza. Na yawu bawu nataka yandi . . . Lupitalu yina ya mumesanu vwandaka ya kifuluka mingi na mutindu ti beto lendaka bika yandi kuna ve, na yawu beto nataka yandi na yinzo ya leta sika wapi bawu yidikaka kisika. Mpe na yawu bawu bokilaka munu diaka kuna. Mu vwandaka zinga ntangu nionso na nzadi, mpe mu vwandaka munati masuwa, na yawu mu vwandaka meka kulokuta bantu, kubasisa bawu na nyamba. Mpe na yawu munu . . . mosi . . .

¹⁹⁵ Bawu bokilaka munu, bawu tubaka, “Yinzo mosi kele na Bala-bala Chestnut, yawu zola kubwa mpe kuzinda. Mama mosi na nkonga ya bana kele na kati,” bawu tubaka, “kana nge banza ti masuwa ya nge, moteur ya nge lenda kuma tii kisika bawu kele.”

Mu tubaka, “Mbote, mu ke sala nionso yina mu lenda sala.”

¹⁹⁶ Mpe munu, mu vwandaka zabuka balundindi yina. Kibaka ya kukanga masa kubukanaka, mpe, oh, la la, . . . masa vwandaka buka mbanza. Mu vwandaka nata na nswalu nionso, kuzabuka babala-bala samu na kukuma na bisika yango. Mpe mu kumaka kuna pene-pene na kisika yina kibaka ya ntama ya kukanga masa vwandaka, mpe masa vwandaka luta mingi kuna. Munu waka muntu mosi kuboka, mpe mu monaka mama mosi ya kutelema na velanda. Mpe bitembo ya nene vwandaka tiamuka na mutindu yina. Mbote, mu landilaka na kumata na lweka *yayi* ntama mingi, mu vutukaka mpe mu kumaka na simu yina. Mu telemisaka masuwa ya munu na ngunga ya mbote mpenza samu mu kanga yawu na dikunzi, na dikunzi ya kielo, dikunzi mosi, to na dikunzi ya velanda. Mu kotaka na yinzo na nswalu nionso mpe mu bakaka mama mpe mu kotisaka yandi na masuwa, na bana zole to tatu. Mu zibulaka masuwa ya munu mpe mu nataka yandi na . . . mu vutulaka yandi. Mu kitaka na nsi mingi, mpe mu kumisaka yandi na lweka ya nzadi, mu tambulaka pene ya ba kilometre zole na kati ya mbanza, na ntwala mu nata yandi na lweka ya nzadi. Na yawu ntangu mu kumaka kuna, yandi vwandaka pema diaka ve. Mpe yandi bandaka . . . yandi vwandaka boka, “Bébé ya munu! Bébé ya munu!”

¹⁹⁷ Mbote, mu banzaka ti yandi zolaka tuba ti yandi bikaka bébé yango na kati ya yinzo. Oh, la la! Mu vutukaka diaka mbangu na ntangu yina bawu vwandaka kumeka kusadisa yandi. Kasi, mu kwisaka bakula ti, yawu vwandaka . . . to yandi vwandaka zola zaba kisika bébé ya yandi vwandaka kuna. Ya vwandaka mwana mosi ya fioti pene-pene ya bamvula tatu, mu banzaka ti yandi vwanda zonzila bébé yina vwandaka kunwa diaka mabele.

¹⁹⁸ Na yawu mu vutukaka mpe mu kumaka kuna. Na yawu ntangu mu kangaka masuwa mpe mu kotaka na kati mpe mu monaka bébé ve, na ntangu yango velanda katukaka mpe yinzo kubwaka mpe yawu zindaka. Mpe mu kwendaka mbangu mpenza mpe mu kangaka kitini ya dibaya yina simbaka masuwa ya munu, mu mataka na masuwa, mu bendaka yawu mpe mu zibulaka yawu.

¹⁹⁹ Na ntangu yina yawu nataka munu na masa ya ngolo na nzadi mpenza. Yawu vwandaka pene-pene ya ngunga kumi na mosi ya mpimpa, mpe mvula ya matadi mpe mvula ya mpembe vwandaka kubwa. Mu kangaka kisimbilu ya nsinga ya kupelisa masuwa, kasi yawu vwandaka manga na kupela, mu mekaka diaka kasi yawu vwandaka manga na kupela, mpe mu mekaka

diaka. Mu kulumukaka na nsi mingi na kati ya masa ya ngolo, mpe basiba vwandaka fioti na nsi. Mu vwandaka meka na mutindu nionso, mpe mu banzaka, “Oh, la la, yayi—yayi mpenza nsuka ya munu! Yimeni!” Mu mekaka diaka na mutindu nionso. Mu tubaka, “Mfumumu, mu ke bondila nge kubika munu ve munu kufwa lufwa ya mutindu yayi,” na manima mu bendaka mpe mu bendaka diaka.

²⁰⁰ Mpe diambu yango vutukilaka munu, “Yinki nge me tuba samu na bantu yina ya kukondwa mfunu yina nge mangaka kutambula na bawu?” Beno me mona? Uh-huh.

²⁰¹ Mu tulaka diboko na zulu ya masuwa, mpe mu tubaka, “Nzambi, wa munu mawa. Kubika ve ti mu bika kento ya munu na bébé kaka mutindu yayi, na ntangu yayi bawu me vwanda kuna na kimbevo! Mu ke bondila Nge!” Na yawu mu landilaka kaka na kubenda mutindu yina, kasi yawu vwandaka manga na kupela. Mpe mu vwandaka kuwa makelele ya masa kuna na nsi, mpamba ve munu. . . Kaka mwa bamuniti fioti, mpe, oh, la la, ya lendaka vwanda mutindu yina. Mpe mu tubaka, “Mfumumu, kana Nge lemvokila munu, mu ke sila na Nge ti mu ke sala nionso.” Mu fukamaka na kati ya masuwa yango, mpe mvula ya matadi vwandaka bula munu na kizizi. Mu tubaka, “Mu ke sala nionso yina Nge zola ti mu sala.” Na yawu mu bendaka diaka, mpe moteur kupelaka. Mu twadisaka yawu na mbangu nionso, mpe nsuka-nsuka mu kumaka na lweka ya nzadi.

²⁰² Mpe mu vutukaka kisika tomabilu vwandaka, tomabilu ya kisalu. Mpe mu banzaka. . . Bayankaka na kati ya bawu tubaka, “Kuwa ti, yinzo ya leta me kwenda na masa.” Kento ya munu na bébé vwandaka kuna, ba-bébé nionso zole.

²⁰³ Mu kwendaka na yinzo ya leta na mbangu nionso, mpe masa fulukaka pene-pene ya ba-metres yiya na ndambu bisika nionso. Mpe major mosi vwandaka kuna, mpe mu tubaka, “Major, lupitalu me suka mutindu yayi?”

Yandi tubaka, “Tala, kumona mpasi ve. Nge kele na muntu ya beno kuna?”

Mu tubaka, “Yinga, kento ya kubela na ba-bébé zole.”

²⁰⁴ Yandi tubaka, “Bawu nionso basikaka.” Yandi tubaka, “Bawu kele na kati ya wagon mosi ya bima mpe bawu kele na nzila samu na kukwenda na Charlestown.”

²⁰⁵ Mu kwendaka mbangu, mu mataka na masuwa ya munu mpe. . . to mu mataka na tomabilu ya munu, mu tulaka masuwa ya munu na manima ya tomabilu, mpe mu kwendaka na nswalu nionso kuna na. . . Mpe masa yina vwandaka kulumuka na bala-bala yawu kulumukaka mpe yawu bikalaka na ba kilometre yiya to tanu. Mpimpa ya muvimba mu mekaka na ku. . . Bayankaka tubaka, “Wagon, wagon ya bima, masa me katula yawu na nzila ya train kuna na kiamvu.”

206 Mbote, mu kukimonaka munu mosi na kati ya kisanga mosi ya fioti, mu bikalaka kuna bilumbu tatu. Mu bakaka ntangu mingi ya kubanza samu na kuzaba kana bawu vwandaka Bantu ya kukondwa mfunu to ve. Mu vwandaka sala nionso, “Kento ya munu kele wapi?”

207 Nsuka-nsuka na ntangu mu monaka yandi, mwa bilumbu na manima ya munu kubasika kuna mpe kuzabuka, yandi vwandaka kuna na zulu ya Columbus, na Indiana, na Yinzo ya ba-Baptiste sika bawu yidikaka kisika mosi mutindu lupitalu, ba-chambre samu na bambevo yina lalaka na mwa bambeto ya leta. Mu kwendaka na mbangu ya munu nionso samu mu kuma kisika yandi vwandaka, mu mekaka na kuzaba kisika yandi vwandaka, mu vwandaka boka, “Hope! Hope! Hope!” Mu talaka, mpe yandi yina ya kulala na mbeto mosi, tuberculose me monana pwelele.

Yandi telemisaka mwa diboko ya yandi yina bikalaka kaka mikwa, mpe yandi tubaka, “Billy.”

Mu kwendaka mbangu kisika yandi vwandaka, mpe mu tubaka, “Hope, cherie.”

Yandi tubaka, “Mu me kuma yimbi, mutindu yina ve?”

Mu tubaka, “Ve, cherie, nge kele mbote.”

208 Pene-pene ya bangonda sambanu beto salaka nionso beto lendaka sala, samu na kumeka kukeba luzingu ya yandi, kasi kimbevo vwandaka kaka kudia nzutu ya yandi malembe-malembe.

209 Kilumbu mosi mu vwandaka na kusalu mpe mu zibulaka radio, mpe mu banza ti mu waka bawu kutuba, kubokila na radio, kutuba, “Bawu ke bokila William Branham, na lupitalu na nswalu nionso, kento ya yandi zola kufwa.” Mu vutukaka na nswalu nionso na lupitalu na mbangu nionso, mu pelisaka mwinda ya mbwaki, mu tulaka sirene, mpe mu kwendaka. Mpe ntangu mu—mu kumaka na lupitalu mpe mu telemaka, mpe mu kotaka na mbangu nionso. Ntangu mu vwandaka katisa na lupitalu, mu kutanaka na nkundi ya munu yina beto vwandaka loba na yandi, beto vwandaka sakana kintwadi ntangu beto vwandaka bana ya fioti, Sam Adair.

210 Docteur Sam Adair, yawu kele samu na yandi vision kwisaka ntama mingi ve mpe tubaka na yandi samu na lupitalu ya yandi. Mpe yandi tubaka ti, kana muntu mosi kutula ntembe na vision yango, yandi bokila na alo-alo na mbongo ya yandi, kana muntu mosi zola zaba kana yawu vwandaka kieleka to ve.

211 Mpe na yawu yandi yina ke kwisa kuna, mpe yandi simbaka yimpu na diboko. Yandi talaka munu mpe na mbala mosi yandi bandaka na kudila. Mu kwendaka mbangu tii kisika yandi vwandaka, mu yambaka yandi. Yandi yambaka munu, yandi tubaka, “Billy, yandi ke na kukwenda.” Yandi tubaka, “Yawu

me sala munu mpasi. Mu me sala nionso mu lenda sala, mu me bokila ba-specialiste mpe nionso yina.”

Mu tubaka, “Sam, ya kieleka yandi ke na kukwenda ve!”

Yandi tubaka, “Yinga, yandi ke na kukwenda.” Mpe yandi tubaka, “Kukota kuna ve, Bill.”

Mpe mu tubaka, “Ya ke lombati mu kota kuna, Sam.”

Mpe yandi tubaka, “Kusala mutindu yina ve. Ve, na lemvo ya nge kusala mutindu yina ve.”

Mu tubaka, “Bika mu kota.”

Yandi tubaka, “Mu ke kwenda na nge.”

²¹² Mu tubaka, “Ve, nge bikala awa. Mu zola vwanda na yandi na muniti ya yandi ya nsuka.”

Yandi tubaka, “Yandi ke kukizaba diaka ve.”

²¹³ Mu kotaka na chambre. Mpe infirmier vwandaka kuna, mpe yandi vwandaka dila samu yandi na Hope vwandaka bankundi ya kalasi. Na yawu mu losaka meso, mpe yandi bandaka na kudila, yandi telemisaka diboko ya yandi. Mu bandaka na kupusana kuna.

²¹⁴ Mu talaka yandi, mpe mu ningisaka yandi. Yandi vwandaka kuna, yandi kondaka kubanda na bakilo makumi tanu, tii na bakilo makumi zole na sambwadi. Mpe mu—mu ningisaka yandi. Mpe ata ti mu me zinga tii na bamvula nkama mosi, mu ke zimbana ata fioti ve yina salamaka. Yandi balukaka, mpe meso ya yandi ya nene mpe ya kitoko talaka munu. Yandi mwetaka. Yandi tubaka, “Samu na yinki nge me vutula munu, Billy?”

Mu tubaka, “Cherie, mu me kuwa nsangu.”

²¹⁵ Yawu lombaka ti mu kwenda sala kosalu. Beto kumaka na bamfuka mingi mpe bankama ya ba-dollar ya kufuta munganga, mpe beto vwandaka na kima ve samu na kufuta yawu. Na yawu ya lombaka ti mu kwenda sala kosalu. Mu vwandaka tala yandi mbala zole to tatu na kilumbu, mpe konso nkokila, diaka ntangu yandi kumaka mutindu yina.

Mu tubaka, “Yinki nge zola tuba, ‘Kuvutula’ nge?”

²¹⁶ Yandi tubaka, “Bill, nge longaka Yawu, nge zonzilaka Yawu, kasi nge zaba ata fioti ve yina Yawu kele.”

Mu tubaka, “Yinki nge ke na kutubila?”

²¹⁷ Yandi tubaka, “Zulu.” Yandi tubaka, “Tala,” yandi tubaka, “bantu vwandaka nata munu na Yinzo, babakala to bakento to banani. Bawu lwataka bilele ya mpembe.” Mpe yandi tubaka, “Mu vwandaka kuwa mbote mpe na ngemba.” Yandi tubaka, “Bandeke ya nene mpe ya kitoko vwandaka dumuka na yinti mosi na yinti yankaka.” Yandi tubaka, “Kubanza ve ti mu ke kukizaba ve.” Yandi tubaka, “Billy, mu ke tuba na nge kifu ya beto.” Yandi tubaka, “Vwanda.” Mu vwandaka ve; mu fukamaka,

mu simbaka yandi na diboko. Yandi tubaka, “Nge zaba kisika beto salaka kifu?”

Mpe mu tubaka, “Yinga, cherie, mu zaba.”

218 Yandi tubaka, “Beto lendaka kuwa Mama ve. Bantu yina vwandaka na kieleka.”

Mpe mu tubaka, “Mu zaba yawu.”

219 Yandi tubaka, “Sila na munu mutindu yayi, ti nge ke tambula na bantu yina,” yandi tubaka, “samu bawu kele na kieleka.” Mpe yandi tubaka, “Sansa bana ya munu mutindu yina.” Mpe munu. . . Yandi tubaka, “Mu zola tuba na nge diambu mosi.” Yandi tubaka, “Mu ke na kufwa, kasi” yandi tubaka “yawu kele. . . mu ke banga ve—mu ke banga ve na kukwenda.” Yandi tubaka, “Yawu ke—yawu ke kitoko.” Yandi tubaka, “Diambu kaka mosi, mu ke sepela ve kubika nge, Bill. Mpe mu zaba ti nge kele na bana ya fioti zole yina nge fwana sansa.” Yandi tubaka, “Sila na munu ti—ti nge ke bikala ve celibataire mpe nge ke bika ve bana ya munu kuwaya-waya bisika nionso.” Yawu vwandaka bandinga mosi ya mayele ya mama ya bamvula makumi zole na mosi.

Mpe mu tubaka, “Mu lenda sila yawu ve, Hope.”

220 Yandi tubaka, “Sila na munu na lemvo ya nge.” Yandi tubaka, “Mu zola tuba na nge kima mosi.” Yandi tubaka, “Nge ke zaba diaka munduki yina?” Mu ke zolaka minduki na mutindu ya bulawu. Na yawu yandi tubaka, “Nge zolaka sumba munduki mosi kilumbu yina kasi nge vwandaka na mbongo ya kulunga ve samu na kufuta ndambu ya ntete.”

Mu tubaka, “Yinga.”

221 Yandi tubaka, “Mu vwandaka bumba mbongo ya munu, ba-cent ya munu tanu—tanu, samu na kumeka kufutila nge ndambu ya mbongo ya munduki yina.” Yandi tubaka, “Ntangu yayi, ntangu diambu yayi ke mana mpe nge ke vutuka na yinzo, nge tala na zulu ya kanapé. . . to mbeto yina ke gumbamaka, na nsi ya kitini ya papié yina kele na zulu, mpe kuna nge ke mona mbongo yango.” Yandi tubaka, “Sila na munu ti nge ke sumba munduki yango.”

222 Beno zaba ve yinki mutindu mu waka na ntangu mu monaka dollar mosi na ba-cent makumi sambwadi na tanu yina (na mbongo ya ba-cent tanu—tanu) na kisika yango. Mu sumbaka munduki yango.

223 Yandi tubaka, “Nge ke bambuka moyo ntangu nge kwendaka na ville samu na kusumbila munu basoseti ya yinda, mpe beto vwandaka kwenda na Fort Wayne?”

Mu tubaka, “Yinga.”

224 Mu katukaka na kuloba, mpe yandi tubaka. . . Beto zolaka kwenda na Fort Wayne, mu zolaka longa na nkokila yina. Mpe

yandi tubaka, “Nge zaba, mu tubaka na nge, ‘Ya ke na mitindu zole ya kuswaswana.’” Mosi vwandaka “mousseline.” Mpe yina yankaka, rayon? Mutindu yina? Rayon na mousseline. Mbote, yawu vwanza nionso yina, yina ya mousseline vwandaka kitoko mingi. Mutindu yina? Mpe yandi tubaka, “Na yawu, sumbila munu yina ya mousseline, yina ya bilumbu yayi.” Beno zaba basoseti yina vwandaka na mwa kima mosi na manima, na zulu? Mu zabaka kima mosi ve na yina me tadila bilele ya bakento, na yawu munu . . .

²²⁵ Mpe na yawu mu vwandaka tambula na nzila mpe mu vwandaka tuba, “Mousseline, mousseline, mousseline, mousseline,” samu mu zimbana ve, “mousseline, mousseline, mousseline.”

Muntu mosi tubaka na munu, “Mbote, Billy!”

²²⁶ Mu tubaka, “Oh, mbote, mbote.” “Mousseline, mousseline, mousseline, mousseline, mousseline.”

²²⁷ Mpe mu kumaka kuna na nsongi mpe mu kutanaka na Tata Spon. Yandi tubaka, “Hé, Billy, nge ke zaba ti ndobo ke kudia bilumbu yayi kuna pene-pene ya dikunzi yina ya nsuka?”

Mu tubaka, “Ya kieleka mpenza, mutindu yina?”

“Yinga.”

Na yawu mu banzaka, na ntangu mu bikaka yandi, “Yinki yawu vwandaka ntete?” Mu me zimbana yawu.

²²⁸ Na yawu Thelma Ford, ntwenia mosi ya kento yina mu zabaka, yandi vwandaka sala na magazini mosi ya ntalu ya mbote. Mu zabaka ti bawu vwandaka tekisa basoseti ya bakento kuna, na yawu mu kwendaka kuna. Mu tubaka, “Mbote, Thelma.”

Yandi tubaka, “Mbote, Billy. Nge ke mbote? Yinki mutindu Hope?”

²²⁹ Mu tubaka, “Mbote.” Mu tubaka, “Thelma, mu ke na nsatu ya makulu zole ya basoseti samu na Hope.”

Yandi tubaka, “Hope ke na nsatu ya basoseti ve.”

Mu tubaka, “Ve, mama, yandi ke na nsatu ya yawu.”

Yandi tubaka, “Nge zola tuba basoseti ya yinda.”

²³⁰ “Oh, ya kieleka,” mu tubaka, “yawu yina.” Mu banzaka, “Uh-oh, mu me talisa mpenza kukondwa kuzaba ya munu.”

Mpe yandi tubaka, “Yandi zola ya yinki mutindu?”

Mu banzaka, “Uh-oh!” Mu tubaka, “Beno kele na yina ya yinki mutindu?”

Yandi tubaka, “Mbote, beto kele na rayon.”

²³¹ Mu zabaka ve kuswasikisa yawu. Rayon, mousseline, nionso yina vwandaka ya kufwanana. Mu tubaka, “Yawu yina mu zola.” Yandi tubaka . . . Mu tubaka, “Kangila munu makulu zole, yina

ke na kulwatama.” Mpe yandi. . . Mu me tuba yawu mbote ve. Yinki yawu kele? Yina ke kangaka nzutu. “Yina ke kangaka nzutu.” Na yawu mu tubaka, “Kangila munu makulu zole.”

²³² Mpe ntangu yandi zolaka pesa munu yawu, yawu vwandaka na ntalu ya ba-cent makumi tatu, ba-cent makumi zole to ba-cent makumi tatu, pene-pene ya ntalu ya kati-kati. Mbote, mu tubaka, “Pesa munu makulu zole.” Beno me mona?

²³³ Mu vutukaka na yinzo, mpe mu tubaka, “Nge zaba, cherie, beno bakento ke tambulaka na bamagazini nionso samu na kusumba na ntalu ya fioti.” Beno zaba mutindu muntu ke zolaka kukikumisa. Mpe mu tubaka, “Kasi, tala awa, mu me sumba bamakulu zole na ntalu yina nge ke sumbaka dikulu mosi. Nge me mona?” Mu tubaka, “Oh, yina kele—yina kele ngolo ya munu mosi.” Nge me mona, mu tubaka—mu tubaka, “Nge zaba, Thelma muntu me tekila munu yawu.” Mu tubaka, “Yawu lunga vwananda ti yandi bikaka kaka mu sumba yawu na ntalu ya kati-kati.”

Yandi tubaka, “Nge me sumba yina ya mousseline?”

²³⁴ Mu tubaka, “Yinga, mama.” Samu na munu nionso yina vwananda kaka mutindu mosi, mu zabaka ve ti yawu vwananda na luswaswanu.

²³⁵ Mpe yandi tubaka na munu, yandi tubaka, “Billy.” Mu monaka yawu ya ngitukulu na ntangu beto kumaka na Fort Wayne, ya lombaka ti yandi sumba makulu zole ya basoseti yankaka. Yandi tubaka, “Mu me kabila yawu mama ya nge,” yandi tubaka, “yawu kele samu na bamama yina me yela.” Yandi tubaka, “Yawu me sala munu mpasi samu mu me sala mutindu yina.”

Mpe mu tubaka, “Oh, kima mosi ve, cherie.”

²³⁶ Mpe yandi tubaka, “Ntangu yayi, kubikala ve—kubikala ve nge mosi.” Mpe yandi tubaka. . . Yandi zabaka ve yina zolaka salama na mwa ntangu fioti na manima ya yawu. Mpe mu simbaka maboko ya yandi ya kitoko na ntangu Bawanzio ya Nzambi vwananda nata yandi.

²³⁷ Mu vutukaka na yinzo. Mu zabaka ve kima ya kusala. Mu lalaka kuna na mpimpa mpe munu waka. . . Mu banza ti yawu vwananda mwa mpuku mosi, yina vwananda na kati ya dituka kisika beto tulaka bapapié. Mpe mu kangaka kielo na dikulu ya munu, mpe robe ya yandi vwananda diembela kuna na manima, (mpe yandi tandamaka kuna na yinzo ya bamvumbi). Mpe kaka na mwa ntangu fioti na manima muntu mosi bokilaka munu, yandi tubaka, “Billy!” Yawu vwananda Mpangi Frank Broy. Yandi tubaka, “Bébé ya nge ke na kufwa.”

Mu tubaka, “Bébé ya munu?”

²³⁸ Yandi tubaka, “Yinga, Sharon Rose.” Yandi tubaka, “Docteur kele kuna na ntangu yayi, mpe yandi me tuba ti, ‘Yandi kele na méningite ya tuberculose, yandi bakaka yawu na

mabele ya mama ya yandi.” Mpe yandi tubaka, “Yandi ke na kufwa.”

²³⁹ Mu kotaka na tomabilu, mu kwendaka kuna. Mpe yandi vwandaka kuna, mwa kigangwa mosi ya kitoko. Mpe bawu nataka yandi na nswalu nionso na lupitalu.

²⁴⁰ Mu basikaka samu mu kutana na yandi. Sam kwisaka kuna mpe yandi tubaka, “Billy, nge kukota na chambre yina ve, nge fwana banza Billy Paul.” Yandi tubaka, “Yandi ke na kufwa.”

Mu tubaka, “Doc, mu—mu zola mona bébé ya munu.”

²⁴¹ Yandi tubaka, “Ve, nge lenda kota ve.” Yandi tubaka, “Yandi kele na meningite, Billy, mpe nge ke sambukisa yawu na Billy Paul.”

²⁴² Mpe mu vingilaka tii kuna yandi basikaka. Mu lendaka kanga ntima ve na kumona yandi kufwa, na ntangu mama ya yandi vwandaka ya kutandama kuna na yinzo ya bamvumbi. Mu ke zabisa beno, nzila ya beto ya masumu kele na mpasi. Mpe mu—mu kwendaka, mu lutaka malembe na kielo, na ntangu Sam basikaka mpe infirmier basikaka, mu kitaka na kitini ya nsi ya ntoto. Yawu kele mwa lupitalu mosi ya fioti. Yandi vwandaka na kisika ya yandi mosi, mpe banzinzi vwandaka na mwa meso ya yandi. Mpe bawu vwandaka na mwa . . .yina beto ke bokilaka “musitikele,” to mwa bukondi ya fioti na zulu ya meso ya yandi. Mpe yandi . . .na mwa kubendana ya misisa, mpe na mwa dikulu ya yandi ya nene yina vwandaka kumata mpe kukita mutindu yina, mpe na mwa maboko ya yandi, samu na kubendana ya misisa. Mu talaka yandi, mpe yandi vwandaka na nene ya kufwana, mpe yandi vwandaka kitoko, yandi vwandaka pene-pene ya bangonda nana.

²⁴³ Mpe mama ya yandi mesanaka kuvwandisa yandi kuna na nganda, yandi lwatisa yandi mwa kushe, beno zaba, yandi vwandaka na nganda na ntangu mu vwandaka kwisa. Mpe ntangu mu vwandaka bula lusipu, yandi vwandaka sala, “gu-gu, gu-gu,” na kutandaka maboko na munu, beno zaba.

²⁴⁴ Mpe cherie ya munu tandamaka kuna, yandi vwandaka kufwa. Mu kitisaka meso na yandi, mpe mu tubaka, “Sharry, nge zaba Papa? Nge zaba Papa, Sharry?” Na yawu ntangu yandi talaka . . .Yandi vwandaka na mpasi mingi na mutindu ti mosi ya mwa meso ya yandi ya kitoko ya bleu kumaka kutala na lweka. Ya monanaka ti ba katulaka munu ntima.

²⁴⁵ Mu fukamaka, mu tubaka, “Mfumumu, yinki mu me sala? Mu vwandaka longa Nsangu ya mbote na bansongi ya babalabala ve? Mu me sala nionso mu lunga sala. Kutangila munu yawu ve. Mu bokilaka bantu yango ata fioti ve ‘bantu ya kukondwa mfunu.’ Mama yina muntu bokilaka bawu ‘bantu ya kukondwa mfunu.’” Mu tubaka, “Mu me wa mawa na mutindu nionso yina salamaka. Lemvokila munu. Kubaka ve—kubaka ve bébé ya munu.” Mpe na ntangu mu vwandaka sambila, kima

mosi ya mutindu ya ndombe. . . rideau mosi to kitenda mosi kulumukaka. Mu zabaka ti Yandi zolaka ve.

²⁴⁶ Ntangu yayi, yina vwandaka ntangu ya munu ya mpasi mingi mpe ya yimbi mingi ya luzingu ya munu. Ntangu mu telemaka mpe mu talaka yandi, mu banzaka . . . Satana tulaka na kati ya mabanza ya munu, “Mbote, nge zola tuba ti kulonga ya ngolo mutindu nge me longa mutindu yayi, mpe mutindu nge me zinga, mpe ntangu yayi yawu me kuma ntangu ya bébé ya nge mosi, Yandi me yambula nge?”

²⁴⁷ Mpe mu tubaka, “Ya kieleka. Kana Yandi lenda vulusa ve bébé ya munu, ntangu yina mu lenda ve. . .” Mu bikaka. Mu—mu zabaka ve kima ya kusala. Na manima mu tubaka mutindu yayi, mu tubaka, “Mfumu, Nge pesaka munu yandi mpe Nge me baka yandi, Nkumbu ya Mfumu kusakumuka! Kana Nge me baka ata mpe munu, mu ke zola Nge kaka.”

²⁴⁸ Mpe mu tulaka diboko na zulu ya yandi, mu tubaka, “Sakumuka, cherie. Papa zolaka kusansa nge, na ntima ya munu ya muvimba mu zolaka kusansa nge, mpe kusansa nge na mutindu ti nge zola Mfumu. Kasi Bawanzio me kwisa baka nge, cherie. Papa ke nata mwa nzutu ya nge mpe kutula yawu na maboko ya Mama. Mu ke zika yawu kintwadi na yandi. Mpe kilumbu mosi Papa ke kutana na nge, vingila kaka kuna na zulu kintwadi na Mama.”

²⁴⁹ Ntangu mama ya yandi vwandaka kufwa, yandi tubaka, bandinga ya nsuka, yandi tubaka, “Bill, bikala na kilanga ya kisalu.”

²⁵⁰ Mu tubaka, “Mu ke. . .” Yandi tubaka. . . Mu tubaka, “Kana mu ke vwanda na kilanga ya kisalu na ntangu Yandi ke kwisa, mu ke baka bana mpe beto ke vukana. Kana mu ke vwanda ve, mu ke zikama pene-pene ya nge. Mpe nge kwenda kuna na diboko ya kibakala ya mwelo ya nene, mpe na ntangu nge ke mona bawu nionso ke kota, telema kuna mpe banda na kuboka, ‘Bill! Bill! Bill!’ na ngolo ya nge nionso. Mu ke kutana na nge kuna.” Mu yambaka yandi samu beto kabwana. Mu kele na kilanga ya mvita bubu yayi. Ya me lunga pene-pene ya bamvula makumi zole. Mu silanaka na kento ya munu, mu ke kutana na yandi.

²⁵¹ Mpe mu bakaka mwa bébé yango, na ntangu yandi fwaka, mpe mu tulaka yandi na maboko ya mama ya yandi, mpe beto nataka yandi na maziami. Mpe mu telemaka kuna samu na kuwa Mpangi Smith, longi ya Methodiste yina longaka na ntangu ya matanga, “Mbombi na mbombi, mpe putulu na putulu.” (Mpe mu banzaka, “Ntima na ntima.”) Yandi kwendaka.

²⁵² Ntama mingi ve na manima ya yina, na suka mosi mu nataka Billy ya fioti kuna. Yandi vwandaka kaka mwana ya fioti. Yandi vwandaka. . .

253 Kikuma yawu yina yandi ke kangamaka na munu mpe munu ke kangamaka na yandi, ya lombaka ti mu vwanda Papa mpe Mama (nionso zole) samu na yandi. Mu vwandaka baka mwa biberon ya yandi. Beto vwandaka na makuki ve ya kupelisa tiya na mpimpa samu miliki ya yandi kubikala na tiya, mpe mu vwandaka tula yawu na nsi ya mukongo ya munu mutindu yayi samu yawu bikala na tiya ya nzutu ya munu.

254 Beto me kangamaka kisika mosi mutindu bankundi, mpe mosi ya bilumbu yayi na ntangu mu ke bika kilanga mu zola pesa yandi Ndinga na maboko, mpe kutuba, “Kwenda na ntwala, Billy. Bikala na Yawu.” Bantu mingi ke kukiyufulaka samu na yinki mu ke vwandaka na yandi ntangu nionso. Mu lenda bika yandi ve. Ata ti yandi me kwelaka, kasi mu ke bambuka kaka yina yandi tubaka na munu, “Bikala na yandi.” Na yawu beto me kangamaka mutindu bankundi.

255 Mu ke bambuka moyo na ntangu mu vwandaka tambula na mbanza, biberon na nsi ya mapeka, yandi bandaka na kudila. Na mpimpa mosi yandi vwandaka . . .beto vwandaka tambula na nganda ya manima ya yinzo sika wapi. . . (Na ntangu yandi kumaka pene-pene ya kubuta yandi, yandi vwandaka pema mbote ve, mpe munu . . .yandi vwandaka kaka mwana-kento ya ntwenia, beno zaba.) Mpe mu vwanda kwenda mpe kuvutuka katuka na yinti mosi ya ntama na manima ya yinzo. Mpe yandi vwandaka didila Mama ya yandi, kasi mu vwandaka na Mama ve sika wapi mu lendaka nata yandi. Mpe mu vwanda nata yandi, mu vwanda tuba, “Oh, cherie.” Mu tubaka . . .

256 Yandi tubaka, “Papa, wapi mama ya munu? Nge me tula yandi na ntoto yina kuna?”

Mu tubaka, “Ve, cheri. Yandi kele mbote, yandi kele kuna na Zulu.”

257 Mpe yandi tubaka kima mosi kuna, yina zolaka kufwa munu, na manima ya midi mosi. Yandi vwandaka dila, na nkokila yango mu vutukaka na nsukinina, mpe mu vwandaka nata yandi mutindu *yayi* na mukongo, mu vwandaka nata yandi na dipeka mpe mu vwandaka simba-simba yandi mutindu *yayi*. Mpe yandi tubaka, “Papa, na lemvo ya nge kwenda baka Mama mpe kwisa na yandi awa.”

Mpe mu tubaka, “Cheri, mu lenda baka Mama ve. Yesu . . .”

Yandi tubaka, “Mbote, tuba na Yesu na kutindila munu mama ya munu. Mu ke na nsatu ya yandi.”

258 Mu tubaka, “Mbote, cheri, munu . . .munu na nge ke mona yandi kilumbu mosi.”

Mpe yandi bikaka, yandi tubaka, “Papa!”

Mpe mu tubaka, “Yinga?”

Yandi tubaka, “Mu me mona Mama kuna na zulu na dituti.”

259 Oh, la la, yawu zolaka kufwa munu! Mu banzaka, “Oh, la la! ‘Mu me mona Mama kuna na zulu na dituti yina.’” Mu zolaka pema diaka ve. Mu kangaka mwa mwana yango na ntulu ya munu mutindu *yayi*, mpe mu kulumusaka yintu na nsi, mu kotaka na yinzo.

260 Bilumbu lutaka. Mu lendaka zimbana yawu ve. Mu vwanda meka na kusala kusalu. Mu vwanda kuka ve na kuvutuka na yinzo, yawu monanaka mutindu yinzo ya munu diaka ve. Mpe mu zolaka kubikala kuna. Beto vwandaka na kima mosi ve na yinzo kasi kaka bima ya ntama ya kubeba, kasi yawu vwandaka kisika yina munu na yandi vwandaka sepela na yawu. Yawu vwandaka yinzo ya beto.

261 Mpe mu ke bambuka moyo kilumbu mosi mu vwandaka meka kusala kusalu ya leta. Mu kwendaka yidika nsinga ya ntama ya lotiliki ya nzila ya zole, yina katukaka na kisika ya yawu, yawu vwandaka na suka-suka mingi. Mpe mu mataka na kulunsi yina. (Mpe mu vwanda kuka ve kuzimbana bébé yango. Mu lendaka mona kento ya munu kukwenda, kasi bébé yina kukwenda, yina vwandaka kaka mwana ya fioti.) Mpe mu vwandaka kuna na zulu, mpe mu vwanda yimbila, “Kuna na zulu ya mongo, Kulunsi mosi ya ntama ya kukondwa kupampama me telema kuna.” Bansinga ya lotiliki ya nzila ya ntete vwandaka kwenda tii na kati ya transformateur mpe vwandaka luta (beno zaba) na yina ya zole. Mpe mu vwandaka na zulu ya yawu. Yawu salamaka ti mu talaka, mpe mwini vwandaka basika na manima ya munu. Mpe kuna, maboko ya munu kutandamaka ndambu na ndambu ya kidimbu ya Kulunsi yango na zulu—na zulu ya mongo. Mu banzaka, “Yinga, yawu vwandaka masumu ya munu yina me tula Yandi kuna.”

262 Mu tubaka, “Sharon, cherie, Papa me fuluka na nsatu ya kumona nge, cherie. Mu zola mpenza kunata nge na maboko ya munu, nge cherie ya munu ya fioti.” Mu vwandaka diaka munu ve. Yawu lutaka basabala. Mu katulaka gant ya munu ya kawutshu. Lotiliki ya ba-volt mafunda zole na nkama tatu yina vwandaka luta na lweka ya munu. Mu katulaka gant ya munu ya kawutshu. Mu tubaka, “Nzambi, mu zola sala diambu yayi ve. Mu kele muntu ya boma.” “Kasi, Sharry, Papa ke mona nge na Mama na minuti fioti.” Mu bandaka na kukatula gant ya munu, samu na kutula diboko ya munu na nsinga yina ya ba-volt mafunda zole na nkama tatu. Yawu lendaka pasula. . . Ee, nge lendaka bikala ata na menga fioti ve. Mpe na yawu mu—mu—mu bandaka na kukatula gant yango, mpe kima mosi salamaka. Ntangu mabanza ya munu vutukaka, mu vwandaka na ntoto na maboko ya munu na zulu mutindu *yayi*, na kizizi ya munu, mu vwandaka dila. Yawu vwandaka lemvo ya Nzambi, to mu lendaka vwanda ve na lukutakanu ya kubeluka ya nzutu awa, mu ke ndima yawu. Yawu vwandaka Yandi ke keba dikabu ya Yandi, munu ve.

263 Mu vutukaka na yinzo. Mu zengaka kisalulu, mu yidikaka bisadulu ya munu. Mpe mu vutukaka, mu tubaka, “Mu me vutuka na yinzo.”

264 Mu kumaka na lweka ya yinzo, mpe mu bakaka mikanda mpe mu kotisaka yawu na yinzo, mwa madidi vwandaka, mpe mu kotaka. Beto vwandaka na chambre mosi kaka, mu vwandaka lala kuna na mwa mbeto ya camp, madidi ya ngolo vwandaka kwisa, mpe dituka yina ya ntama vwandaka kuna. Mu bakaka mikanda mpe mu tangaka yawu, mpe kima ya ntete na mikando yango vwandaka mwa ekonomi ya yandi ya Noel, ba-cent makumi nana, “Mademoiselle Sharon Rose Branham.” Yawu yina kuna, yawu me vutuka diaka.

265 Mu vwandaka ntete mukengi ya baniamama ya mfinda. Mu kotisaka diboko kuna mpe mu bakaka munduki ya munu, pistolet ya munu, kuna na pokosi ya yawu. Mu tubaka, “Mfumu, mu—mu lenda kanga diaka ntima ve, mu ke—mu ke na kufwa. Mu—mu ke kukiyangisa mingi.” Mu yidikaka disasi na kati ya munduki, mu talisaka yawu na yintu ya munu, mu fukamaka na mbeto yina ya camp kuna na chambre yina ya mpimpa bwi. Mu tubaka, “Tata ya beto Yina kele na Mazulu, bika Nkumbu ya Nge kusantisama. Bika Kimfumu ya Nge kukwisa, bika luzolo ya Nge kusalama,” mpe mu mekaka, mpe mu finaka kibudilu na ngolo ya munu nionso, mu tubaka, “na ntoto mutindu mosi na Mazulu. Pesa beto bubu yayi madia ya beto ya konso kilumbu.” Kasi munduki mangaka na kubula!

266 Mpe mu banzaka, “O Nzambi, Nge ke na kuzenga munu bitini-bitini? Yinki mu me sala? Nge zola ata kubika munu kufwa ve.” Mu losaka munduki na ntoto, mpe yawu bulaka mpe yawu zengisaka yinzo. Mu tubaka, “Nzambi, samu na yinki mu lenda kufwa ve mpe kukatuka na diambu yayi? Mu lenda kwenda diaka ntama ve. Nge lenda sala kima mosi samu na munu.” Mpe mu bwaka mpe bandaka na kudila na mwa mbeto, ya ntama mpe ya mvindu.

267 Mpe ya fwana vwanda ti mu kwendaka kulala. Mu zaba ve kana mu lalaka to yinki salamaka.

268 Mu ke zolaka ntangu nionso kukwenda kuna na Weste. Mu vwandaka ntangu nionso na nsatu ya mosi ya bayimpu yina. Tata ya munu vwandaka sansa bampunda na buleki ya yandi, mpe mu vwandaka ntangu nionso na nsatu ya mosi ya bayimpu yina. Mpe Mpangi Demos Shakarian sumbilaka munu mosi mazono, ya ntete yina mu me kuzwa (yina me kuzwa) ya mutindu yina, mosi ya bayimpu yina ya weste.

269 Mpe mu banzaka ti mu vwandaka zengisa nseke mosi, mpe mu vwanda yimbila mukunga yayi, “Piné mosi ya pusu me bukana, ya me sonama na lupangu ya baniamama ti, ‘Ya Kuteka.’” Mpe ntangu mu vwanda kwenda na ntwala, mu monaka pusu mosi ya ntama ya kufika, mutindu pusu mosi ya ntama ya nseke,

mpe piné ya yawu vwandaka ya kubukana. Ya kieleka, yawu vwanda talisa dibuta ya munu yina bukanaka. Mpe ntangu mu kumaka pene-pene, mu talaka, mpe tala mwana-kento mosi ya kitoko mingi, ya ntwenia, ya bamvula pene-pene ya makumi zole, na bansuki ya mpembe ya kupanzana mpe meso ya bleu, yandi lwataka bilele ya mpembe. Mu talaka yandi, mu tubaka, “Mbote na nge?” Mu lutaka.

Yandi tubaka, “Mbote, Papa.”

²⁷⁰ Mpe mu balukaka, mu tubaka, “Papa?” “Ee,” mu tubaka, “yinki mutindu, Mademoiselle, nge lenda. . . mu lenda vwanda papa ya nge na ntangu nge ke me kuma mbuta mutindu mosi na munu?”

²⁷¹ Yandi tubaka, “Papa, nge ke na kuzaba kaka ve kisika nge kele.”

Mpe mu tubaka, “Yinki nge zola tuba?”

²⁷² Yandi tubaka, “Awa kele na Zulu.” Yandi tubaka, “Na ntoto mu vwandaka Sharon ya nge ya fioti.”

“Ee,” mu tubaka, “cherie, nge vwandaka kaka mwa bébé ya fioti.”

²⁷³ Yandi tubaka, “Papa, ba-bébé ya fioti kele ba-bébé ya fioti awa ve, bawu ke fwaka ve. Bawu ke nunaka biboba ve to bawu ke yelaka ve.”

²⁷⁴ Mpe mu tubaka, “Mbote, Sharon, cherie, nge—nge ke ntwenia ya kento, ya kitoko.

Yandi tubaka, “Mama ke na kuingila nge.”

Mpe mu tubaka, “Wapi?”

Yandi tubaka, “Kuna na zulu na yinzo ya beno ya malu-malu.”

²⁷⁵ Mpe mu tubaka, “Yinzo ya malu-malu?” Ba-Branham kele bawaya-waya, bawu ke vwandaka na yinzo ve, bawu kele kaka. . . Mpe mu tubaka, “Mbote, mu me vwandaka ata fioti ve na yinzo, cherie.”

²⁷⁶ Yandi tubaka, “Kasi nge kele na mosi awa na zulu, Papa.” Mu zola sala mutindu bébé ve, kasi yawu kele diambu ya kieleka samu na munu. [Mpangi Branham me dila—Mu.] Ntangu mu me banda na kubanza na yawu mutindu yayi, yawu ke na kuvutukila munu diaka. Yandi tubaka, “Nge kele na mosi awa, Papa.” Mu zaba ti mu kele na mosi kuna, kilumbu mosi mu ke kwenda kuna. Yandi tubaka, “Wapi Billy Paul, mpangi ya munu ya bakala?”

²⁷⁷ Mpe mu tubaka, “Mbote, mu me bika yandi na Mama Broy, yawu me luta mwa minuti fioti.”

Yandi tubaka, “Mama zola mona nge.”

²⁷⁸ Mu balukaka mpe mu talaka, mpe yawu vwandaka na bayinzo ya kitoko, mpe Nkembo ya Nzambi vwandaka kwisa

fika yawu. Mpe mu waka nkonga ya Bawanzio kuyimbila, “Yinzo ya munu, Yinzo ya kitoko.” Mu bandaka na kumata na kikalu ya yinda, na mbangu ya munu nionso. Mpe ntangu mu kumaka na kielo, yandi yina telemaka kuna, yandi lwataka bilele ya mpembe, na bansuki ya ndombe, ya yinda, yawu me kulumuka tii na mukongo. Yandi tandaka maboko ya yandi, mutindu yandi vwanda sala na ntangu nionso mu vwanda vutuka na yinzo ya kulemba to kima mosi. Mu simbaka yandi na maboko, mpe mu tubaka, “Cherie, mu me mona Sharon kuna.” Mu tubaka, “Yandi me kuma ntwenia ya kento ya kitoko, mutindu yina ve?”

279 Yandi tubaka, “Yinga, Bill.” Yandi tubaka, “Bill.” Yandi tulaka munu maboko ya yandi, (mpe yandi tubaka) kaka na mapeka ya munu, yandi bandaka kusimba-simba munu, yandi tubaka, “Bika kukiyangisa samu na munu na Sharon.”

Mu tubaka, “Cherie, yawu ke mpasi mingi samu na munu.”

280 Yandi tubaka, “Ntangu yayi Sharon na munu kele mbote mingi kuluta nge.” Mpe yandi tubaka, “Kukiyangisa diaka ve samu na beto. Nge ke sila yawu na munu?”

281 Mpe mu tubaka, “Hope,” mu tubaka, “mu me bikala kaka munu mosi samu na nge na Sharon, mpe Billy ke na kudila ntangu nionso samu na nge.” Mu tubaka, “Mu zaba ve yinki mu ke sala samu na yandi.”

282 Yandi tubaka, “Nionso ke tambula mbote, Bill.” Yandi tubaka, “Sila na munu ti nge ke kukiyangisa diaka ve.” Yandi tubaka, “Nge lenda vwanda ve?” Mu talaka pene-pene ya munu mpe yawu vwandaka na kiti mosi ya nene.

283 Mpe mu ke bambuka moyo ti mu vwandaka meka na kusumba kiti mosi. Ntangu yayi, samu na kusukisa. Mu vwanda sosa kusumba kiti na ntangu mosi. Beto vwandaka kaka na bakiti ya ntama—ntama ya mabaya yina bantu nionso ke vwandaka na yawu na kisika ya madia ya suka. Ya lombaka ti beto sadila yawu, yawu yina kaka beto vwandaka na yawu. Mpe beto lendaka sumba mosi ya bakiti yayi beno ke ladisaka na yawu mukongo, mutindu. . . Mu me zimbana mutindu ba ke bokilaka kiti yango ya kupemisa nzutu. Mpe yawu vwandaka na ntalu ya ba-dollar kumi na sambwadi, mpe beno lenda futa ntete ba-dollar tatu mpe dollar mosi na sabala mosi. Mpe beto sumbaka mosi. Mpe, oh, na ntangu mu vwanda kuma na yinzo. . . Mu vwanda sala kisalu kilumbu ya muvimba, mpe kulonga tii na kati-kati ya mpimpa na bala-bala mpe bisika nionso mu lendaka longa.

284 Mpe—mpe munu kilumbu mosi mu kumaka na mfuka na bakufuta ya munu. Beto vwanda kuka ve na kufuta yawu, mpe ntangu lutaka kilumbu na manima kilumbu, mpe na nsuka-nsuka kilumbu mosi bawu kwisaka mpe bakaka kiti ya munu mpe kwendaka na yawu. Na mpimpa yango, mu ke zimbana yawu ata fioti ve, yandi lambilaka munu tarte ya kutula cerise.

Mwana ya bantu, yandi—yandi—yandi zabaka ti mu ke sepela ve. Mpe na manima ya madia ya nkokila mu tubaka, “Samu na yinki nge kele mbote mutindu yayi na nkokila yayi, cherie?”

²⁸⁵ Mpe yandi tubaka, “Wa, mu tindaka bana-babakala ya kizunga na kusosila nge bampambu samu na kuloba. Nge ke mona ve ti beto fwana kwenda na nzadi mpe kuloba mwa fioti?”

Mpe mu tubaka, “Yinga, kasi . . .”

²⁸⁶ Mpe yandi bandaka na kudila. Mu zabaka ti diambu mosi ke na kutambula mbote ve. Mu bakaka dibanza mosi samu bawu tindaka munu luzabusu mosi ti bawu zolaka kwisa botula yawu. Mpe beto vwandaka kuka ve na kufuta dollar mosi yina na sabala. Beto vwanda kuka ve, beto lendaka ve. . . beto vwandaka na makuki ya kufuta yawu ve. Yandi ziungisaka munu maboko ya yandi, mu kwendaka na kielo mpe kiti ya munu kwendaka.

Yandi tubaka na munu kuna na Zulu, yandi tubaka, “Nge ke bambuka kiti yina, Bill?”

Mpe mu tubaka, “Yinga, cherie, mu ke bambuka yawu.”

Yandi tubaka, “Yawu yina nge vwanda banza, mutindu yina ve?”

“Yinga.”

²⁸⁷ Yandi tubaka, “Mbote, ba ke botula yayi ve, yayi me sumbamaka.” Yandi tubaka, “Vwanda mwa fioti, mu zola solula na nge.”

Mpe mu tubaka, “Cherie, mu ke na kubakula diambu yayi ve.”

²⁸⁸ Mpe yandi tubaka, “Sila na munu, Billy, sila na munu ti nge ke kukiyangisa diaka ve. Nge ke vutuka ntangu yayi.” Mpe yandi tubaka, “Sila na munu ti nge ke kukiyangisa ve.”

Mpe yandi tubaka, “Mu lenda sala yawu ve, Hope.”

²⁸⁹ Mpe kaka na ntangu yango mabanza ya munu vutukaka, yawu vwandaka mpimpa bwi na kati ya yinzo. Mu talaka pene-pene ya munu, mpe mu waka diboko ya yandi na nkingu ya munu. Mu tubaka, “Hope, nge kele awa na yinzo?”

²⁹⁰ Yandi bandaka kusimba-simba munu. Yandi tubaka, “Nge ke pesa munu nsilulu yina, Bill? Sila na munu ti nge ke kwela ve. . . nge ke kukiyangisa diaka ve.”

Mu tubaka, “Mu ke sila na nge.”

²⁹¹ Mpe ntangu yandi me simba-simba munu mbala zole to tatu, mpe yandi kwendaka. Mu telemaka mbala mosi mpe mu pelisaka mwinda, mu talaka bisika nionso, yandi kwendaka. Kasi yandi basikaka kaka na yinzo. Yandi me kwendaka ve, yandi ke na kuzinga kaka. Yandi vwandaka Muklisto.

²⁹² Mwa ntangu fioti me luta Billy na munu kwendaka awa na ntoni, beto nataka mwa bafelele samu na mama ya yandi mpe

mpangi ya yandi ya kento, yawu vwandaka na suka ya Paki, mpe beto telemaka. Mwana yayi ya fioti bandaka na kudila, yandi tubaka, “Papa, mama ya munu kele kuna na nsi.”

²⁹³ Mu tubaka, “Ve, cheri. Ve, yandi kele kuna na nsi ve. Mpangi-kento kele kuna na nsi ve. Beto kele na ntoni ya kufika awa, kasi kuna na simu ya nzadi kele na ntoni ya kuzibuka sika wapi Yesu vumbukaka na lufwa. Mpe kilumbu mosi Yandi ke kwisa, Yandi ke nata Mpangi-kento mpe Mama na Yandi.”

²⁹⁴ Mu kele na kilanga ya mvita bubu yayi, bankundi ya munu. Mu—mu lenda tuba diaka ve. Munu. . . [Mpangi Branham me dila—Mu.] Nzambi sakumuna beno. Beto kulumusa bayintu ya beto mwa ntangu fioti.

²⁹⁵ O Mfumu! Mbala mingi, Mfumu, mu zaba ya kieleka ti bantu ke bakulaka ve, na ntangu bawu ke banza ti mambu yayi ke kwisaka na pete. Kasi kilumbu mosi ya nkembo ke na kukwisa ntangu Yesu ke kwisa mpe minianga ya beto nionso ke zimbana. Mu ke sambila, Tata ya Mazulu, ti Nge ke sadisa beto na kukubama.

²⁹⁶ Mpe nsilulu yina ya nsuka, ntangu mu yambaka yandi na ditama na suka yina, ti mu ke kutana na yandi kuna kilumbu yina. Mu banza ti yandi ke telema na dikunzi yango, yandi ke bokila nkumbu ya munu. Kubanda ntangu yina mu ke na kuzinga na kieleka na ntwala ya nsilulu yina, Mfumu, na yinza ya muvimba, na bisika ya mutindu na mutindu, kumeka kulonga Nsangu ya mbote. Mu ke na kununa ntangu yayi, mpe ya kulemba, mu me lemba mingi. Mosi ya bilumbu yayi mu ke kanga Biblia yayi samu na mbala ya nsuka. Mpe, Nzambi, keba munu na kubikala ya kwikama na nsilulu yayi. Zinga munu ntangu nionso na lemvo ya Nge, Mfumu. Kubika munu ve mu tala bima ya luzingu yayi, kasi mu zinga samu na bima yina kele na simu yina. Sadisa munu na kuvwanda ya kusungama. Mu ke lomba bima ya pete ve, ve, Mfumu, na ntangu Klisto ya munu kufwaka kuna na mpasi. Mpe bayankaka nionso me bikala kufwaka mutindu yina. Mu ke lomba ve kima mosi ya pete. Bika mu vwanda ya kusungama, Mfumu, na kutuba kieleka. Sala ti bantu kuzola munu na yawu mu lenda twadisa bawu na Nge. Mpe kilumbu mosi, na ntangu nionso ke kuma na nsuka mpe beto ke vukana na nsi ya bayinti yina ke vwandaka ya mubisu ntangu nionso, mu zola ti mu simba yandi na diboko mpe mu twadisa yandi, mu talisa bantu ya Tempelo Angelus mpe bayankaka nionso. Ya ke vwanda ntangu mosi ya nene mingi.

²⁹⁷ Mu ke sambila ti mawa ya Nge kuvwanda na zulu ya mosi na mosi ya beto awa. Mpe bayina kele awa, Mfumu, mbala yankaka bawu zaba Nge ve. Mpe mbala yankaka bawu kele na mwana mosi ya luzolo na simu yina ya nzadi. Kana bawu me lungisaka ntete ve nsilulu ya bawu, bika bawu sala yawu na ntangu yayi, Mfumu.

298 Na ntangu beto me kulumusa bayintu ya beto, mu ke kukiyufula na manima ya midi yayi na kati ya yinzo yayi ya nene, yikwa na kati ya beno ke tuba “Mpangi Branham, munu mpe, mu zola kutana na bankundi ya munu ya luzolo. Mu—mu—mu kele na bankundi ya luzolo kuna na simu yina yankaka ya nzadi”? Mbala yankaka beno pesaka nsilulu ti beno ke kutana na bawu, mbala yankaka ntangu beno pesaka Mama “mbote ya nsuka” kuna na ntoni kilumbu mosi, mbala yankaka ntangu beno pesaka na Mpangi-kento ya leki “mbote ya nsuka,” to Papa, to na mosi ya bawu kuna na ntoni, beno silaka ti beno ke kutana na bawu, mpe beno—beno me kubama samu na yawu ntete ve. Beno banza ve ti yayi ke ntangu ya mbote ya kusala yawu ntangu yayi?

299 Beno lemvokila munu na mutindu mu me lemba. Kasi, oh, la la, beno ke bakula ve, nkundi ya munu. Beno zaba ve yinki mutindu—yinki mutindu mu ke na kufwa nzutu! Yayi ke kitini ve, na kutala, ya disolo ya luzingu.

300 Yikwa na kati ya beno ke zola kutelema ntangu yayi mpe kupusana awa samu na kisambu, kutuba, “Mu zola kutana na bankundi ya munu ya luzolo”? Beno telema na kati ya bantu mpe beno kwisa kwaku. Beno ke sala yawu? Kana ya kele na muntu mosi me kubama ntete ve. Nzambi sakumuna nge, tata. Mu ke na kumona bakala mosi ya ndombe ya mbuta ke na kupusana, bayankaka mpe ke na kupusana. Beno ningana beno mosi, beno kuna na zulu ya balcon, beno kwisa telema na kati ya banzila. To beno telema, beno yina ke zola ti ba bambuka beno na mwa kisambu na ntangu yayi. Ya ke mutindu yina. Beno telema. Ya ke mbote. Beno telema, bisika nionso, beno yina ke zola tuba, “Mu ke na tata kuna na simu, mu ke na mama to nkundi ya luzolo kuna na simu. Mu zola kwenda mona bawu. Mu zola kwenda kutana na bawu na ngemba.” Beno zola telema, beno telama kaka, bisika nionso na kati ya bantu. Beno telema kaka, beno tuba, “Mu zola ndima yawu.”

301 Nzambi sakumuna nge, mama. Nzambi sakumuna nge kuna na manima. Ya sakumuna nge kuna na zulu. Mfumu sakumuna nge awa, tata. Ya ke mbote. Kuna na zulu ya balcon, Mfumu sakumuna beno. Ndambu na ndambu, bisika nionso, beno telema ntangu yayi samu beto sala mwa kisambu, na ntangu Mpeve-Santu kele awa mpe ke tambula na zulu ya bantima ya beto, samu na ku—ku—kubuka beto.

302 Beno zaba, yina dibuundu kele na yawu nsatu bubu yayi kele kubukana. Beto ke na nsatu ya kukwenda tii na Yinzo ya Muntu yina ke yidikaka banzungu ya ntoto. Théologie ya beto ya kukangama mbala yankaka yawu ke tambulaka mbote ve. Yina beto ke na yawu nsatu kele kubukana ya mutindu ya ntama, kuwa mawa na kati ya bantima ya beto, kukuma ya lembami na ntwala ya Nzambi. Bayina nionso me kubama samu na kutelema ntangu yayi bawu yayi?

Beto kulumusa bayintu ya beto samu na kusambila.

³⁰³ O Mfumu, Yina vumbulaka Yesu na lufwa samu na... na kati ya bafwa, samu na kunungisa beto na nzila ya lukwikilu, na kukwikilaka. Mu ke sambila, Mfumu, ti bayayi me telema samu na kundima Nge, mu ke sambila ti lemvo kupesama na bawu. Mpe, O Mfumu, mu ke sambila ti bawu ndima Nge mutindu Mvulusi mpe Ntinu mpe Zola ya bawu, mpe mbala yankaka bawu kele na mama to papa to muntu mosi na simu yankaka ya nzadi. Diambu mosi kaka kele ya kieleka ti, bawu kele na Mvulusi. Bika ti nge lemvokila masumu ya bawu, mpe masumu ya bawu ya nkú nionso kukatuka, ti bamoyo ya bawu kusukulama na Menga ya Mwana-dimeme, mpe bawu zinga na ngemba kubanda na ntangu yayi.

³⁰⁴ Mpe Kilumbu mosi ya nkembo na ntangu nionso ke suka, bika ti beto vukana na Yinzo ya Nge, mpe beto vwanda kuna mutindu mabuta ya kukabwana ve, samu na kukutana na bankundi ya beto ya luzolo yina kele na kuingila na simu yina yankaka. Yayi, beto me pesa bawu na Nge, samu ti “Nge ke keba na ngemba ya kulunga yandi yina ke tula ntima na Yandi.” Pesa yawu, Mfumu, mutindu beto ke pesa bawu na Nge. Na Nkumbu ya Mwana ya Nge, Mfumu Yesu. Amen.

³⁰⁵ Nzambi sakumuna beno. Mu zaba ya kieleka ti misadi kele na kumona kisika beno me telema, mpe bawu ke vwanda na beno na mwa minuti fioti.

³⁰⁶ Mpe ntangu yayi na bayina ke baka bakalati ya bisambu. Billy, Gene na Leo kele wapi, bawu kele kuna na nsuka? Bawu kele awa samu na kukabula bakalati ya bisambu na mwa minuti fioti. Mpangi-bakala ke sambila samu na kupanza bantu, mpe ba ke kabula bakalati ya bisambu. Beto ke vutuka awa na manima ya mwa ntangu fioti, samu na kusambila samu na bambevo. Mbote mingi, mpangi-bakala.



DISOLO YA LUZINGU YA MUNU KNG59-0419A
(My Life Story)

Nsangu yayi ya Mpangi William Marrion Branham, kulongamaka na Kingelesi na Lumingu na manima ya midi, na kilumbu ya 19 ya Ngonda ya yiya, na mvula 1959, na Tempelo Angelus na Los Angeles, Californie, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org